

欽定宋書

卷五  
七十

宋書卷五

梁

沈

約

撰

本紀第五

文帝

太祖文皇帝諱義隆小字車兒武帝第三子也晉安帝  
義熙三年生於京口盧循之難上年四歲高祖使諮議  
參軍劉粹輔上鎮京城十一年封彭城縣公高祖伐羌  
至彭城將進路板上行冠軍將軍留守晉朝加授使持  
節監徐兗青冀四州諸軍事徐州刺史將軍如故關中  
平定高祖還彭城又授監司州豫州之淮西兗州之陳

留諸軍事前將軍司州刺史持節如故將鎮洛陽仍改授都督荆益寧雍梁秦六州豫州之河南廣平揚州之義成松滋四郡諸軍事西中郎將荊州刺史持節如故永初元年封宜都王食邑三千戶進督北秦并前七州進號鎮西將軍給鼓吹一部又進督湘州是歲入朝時年十四長七尺五寸博涉經史善隸書景平二年七月中少帝廢百官備法駕奉迎入奉皇統行臺至江陵進璽紱侍中臣琇散騎常侍臣嶷之中書監尚書令護軍將軍建成縣公臣亮左衛將軍臣景仁給事中游擊將軍龍鄉縣侯臣隆越騎校尉都亭侯臣綱給事黃門侍

郎臣孔璩之散騎侍郎臣劉思考員外散騎侍郎臣潘  
盛中書侍郎臣何尚之羽林監封陽縣開國侯臣蕭思  
話長兼尚書左丞德陽縣侯臣孫康吏部郎中騎都尉  
臣張茂度儀曹郎中臣徐長琳倉部郎中臣庾俊之都  
官郎中臣袁洵等上表曰臣聞否泰相革數窮則變天  
道所以不諂卜世所以靈長乃者運距陵夷王室艱晦  
九服之命靡所適歸高祖之業將墜于地賴基厚德深  
人神同獎社稷以寧有生獲又伏惟陛下君德自然聖  
明在御孝悌著於家邦風猷宣於蕃牧是以徵祥雜沓  
符瑞燿輝宗廟神靈乃睠西顧萬邦黎獻望景託生臣

等忝荷朝列豫充將命復集休明之運再覩太平之業  
行臺至止瞻望城闕不勝喜說鳧藻之情謹詣門拜表  
以聞上答曰皇運艱弊數鍾屯夷仰惟崇基感尋國故  
永慕厥躬悲慨交集賴七百祚永股肱忠賢故能休否  
以泰天人式序猥以不德謬降大命顧已兢悸何以克  
堪輒當暫歸朝廷展哀陵寢并與賢彥申寫所懷望體  
其心勿爲辭費府州佐史竝稱臣請題榜諸門一依宮  
省上不許甲戌發江陵八月丙申車駕至京城丁酉謁  
初寧陵還於中堂卽皇帝位

元嘉元年秋八月丁酉大赦天下改景平二年爲元嘉

元年文武賜位二等逋租宿債勿復收庚子以行撫軍將軍荊州刺史謝晦爲撫軍將軍荊州刺史癸卯司空錄尚書事揚州刺史徐羨之進位司徒衛將軍江州刺史王弘進位司空中書監護軍將軍傅亮加左光祿大夫開府儀同三司撫軍將軍荊州刺史謝晦進號衛將軍鎮北將軍南兗州刺史檀道濟進號征北將軍甲辰追尊所生胡婕妤爲皇太后諡曰章后衛將軍南徐州刺史彭城王義康進號驃騎將軍冠軍將軍南豫州刺史義恭進號撫軍將軍封江夏王立第六皇弟義宣爲竟陵王第七皇弟義季爲衡陽王戊申以豫州刺史劉

粹爲雍州刺史驍騎將軍管義之爲豫州刺史南蠻校尉到彥之爲中領軍己酉減荆湘二州今年稅布之半九月丙子立妃袁氏爲皇后

二年春正月丙寅司徒徐羨之尚書令傅亮奉表歸政上始親覽車駕祠南郊大赦天下三月乙丑左將軍徐州刺史王仲德進號安北將軍夏五月戊寅特進謝澹卒秋八月甲申以關中流民出漢川置京兆扶風馮翊等郡乙酉驃騎將軍南徐州刺史彭城王義康爲開府儀同三司新除司空王弘爲車騎大將軍開府儀同三司以右軍長史江恒爲廣州刺史冬十一月癸酉以前

將軍楊玄爲征西將軍北秦州刺史

三年春正月丙寅司徒錄尚書事揚州刺史徐羨之尚書令護軍將軍左光祿大夫傅亮有罪伏誅遣中領軍到彥之征北將軍檀道濟討荊州刺史謝晦上親率六師西征大赦天下丁卯以車騎大將軍江州刺史王弘爲司徒錄尚書事揚州刺史驃騎將軍南徐州刺史彭城王義康改爲荊州刺史撫軍將軍南豫州刺史江夏王義恭改爲南徐州刺史己巳以前護軍將軍趙倫之爲鎮軍將軍閏月丙戌皇子劭生二月乙卯繫囚見徒一皆原赦戊午以金紫光祿大夫王敬弘爲尚書左僕



射豫章太守鄭鮮之爲尚書右僕射建安太守潘城有  
罪伏誅庚申特進范泰加光祿大夫是日車駕發京師  
戊辰到彥之檀道濟大破謝晦於隱磯丙子車駕自蕪  
湖反旆己卯擒晦於延頭送京師伏誅三月辛巳車駕  
還宮夏五月乙未以征北將軍南兗州刺史檀道濟爲  
征南大將軍江州刺史中領軍到彥之爲南豫州刺史  
戊戌以後將軍長沙王義欣爲南兗州刺史乙巳驃騎  
大將軍涼州牧大沮渠蒙遜改爲車騎大將軍詔曰夫  
哲王宰世廣達四聰猶巡嶽省方採風觀政所以情僞  
必審幽遐罔滯王澤無擁九臯有聞者也朕以寡薄猥

纂洪緒雖永念治道志存昧旦願言傅巖發想宵寐而  
丘園之秀藏器未臻物情民隱尚隔視聽乃眷區域輟  
寢忘食今氛祲祛蕩宇內寧晏旌賢弘化於是乎始可  
遣大使巡行四方其宰守稱職之良閭葦一介之善詳  
悉列奏勿或有遺若刑獄不卹政治乖謬傷民害教者  
具以事聞其高年鰥寡幼孤六疾不能自存者可與郡  
縣優量賑給博採輿誦廣納嘉謀務盡銜命之旨俾若  
朕親覽焉丙午車駕臨延賢堂聽訟六月己未以鎮軍  
將軍趙倫之爲左光祿大夫領軍將軍丙寅車駕又於  
延賢堂聽訟丙子又聽訟以右衛王華爲中護軍冬十

一月戊寅以梁南秦二州刺史吉翰爲益州刺史驃騎  
參軍劉道產爲梁南秦二州刺史己亥以南蠻校尉劉  
遵考爲雍州刺史十二月癸丑以中書侍郎蕭思話爲  
青州刺史壬戌前吳郡太守徐佩之謀反及黨與皆伏  
誅

四年春正月乙亥朔曲赦都邑百里內辛巳車駕親祠  
南郊二月乙卯行幸丹徒謁京陵三月丙子詔曰丹徒  
桑梓綢繆大業攸始踐境永懷觸感罔極昔漢章南巡  
加恩元氏況情義二三有兼曩日思播遺澤酬慰士民  
其蠲此縣今年租布五歲刑以下皆悉原遣登城三戰

及大將家隨宜隱卹丁亥車駕還宮戊子尚書右僕射  
鄭鮮之卒壬寅禁斷夏至日五絲命縷之屬富陽令諸  
葛闡之之議也夏四月庚戌以廷尉王徽之爲交州刺  
史五月壬午中護軍王華卒京師疾疫甲午遣使存問  
給醫藥死者若無家屬賜以棺器六月癸卯朔日有蝕  
之庚申以金紫光祿大夫殷穆爲護軍將軍

五年春正月乙亥詔曰朕恭承洪業臨饗四海風化未  
弘治道多昧求之人事鑒寐惟憂加頃陰陽違序旱疫  
成患仰惟災戒責深在予思所以側身剋念議獄詳刑  
上答天譴下恤民瘼羣后百司其各獻讜言指陳得失

勿有所諱甲申車駕臨玄武館閱武戊子京邑大火遣使巡慰賑賜夏四月己亥以南蠻校尉蕭摹之爲湘州刺史戊午以始興太守徐豁爲廣州刺史五月己卯以湘州刺史張邵爲雍州刺史六月庚戌司徒王弘降爲衛將軍開府儀同三司京邑大水己卯遣使檢行賑贍以江夏內史程道惠爲廣州刺史秋八月壬戌特進左光祿大夫范泰卒冬十月甲辰車駕於延賢堂聽訟聞月癸未以右軍司馬劉德武爲豫州刺史辛卯安陸公相周籍之爲寧州刺史十二月庚寅左光祿大夫領軍將軍趙倫之卒是歲天竺國遣使獻方物

六年春正月辛丑車駕親祠南郊癸丑以驃騎將軍荊州刺史彭城王義康爲司徒錄尚書事領平北將軍徐州刺史三月丁巳立皇子劭爲皇太子戊午大赦天下賜文武位一等辛酉以左衛將軍殷景仁爲中領軍夏四月癸亥以尚書左僕射王敬弘爲尚書令丹陽尹臨川王義慶爲尚書左僕射吏部尚書江夷爲尚書右僕射五月壬辰朔日有蝕之癸巳以新除尚書令王敬弘爲特進左光祿大夫甲午以撫軍司馬劉道濟爲益州刺史乙卯於雍州置馮翊郡七月己酉以尚書左丞孔默之爲廣州刺史是月百濟王遣使獻方物九月戊午

於秦州置隴西宋康二郡冬十月壬申中領軍殷景仁  
丁艱去職十一月己丑朔日有蝕之十二月丁亥河南  
國西河王遣使獻方物

七年春正月癸巳以吐谷渾慕容瓚爲征西將軍沙州  
刺史是月倭國王遣使獻方物三月戊子遣右將軍到  
彥之北伐水軍入河甲午以前征虜司馬沖爲司州刺  
史甲寅以前中領軍殷景仁爲領軍將軍夏四月癸未  
訶羅單國遣使獻方物六月己卯以冠軍將軍氏楊難  
當爲秦州刺史秋七月戊子索虜碯礮戍棄城走丙申  
以平北諮議參軍甄法護爲梁南秦二州刺史戊戌索

虜滑臺戍棄城走甲寅林邑國訶羅佗國師子國遣使  
獻方物冬十月甲寅罷南豫州并豫州以左將軍竟陵  
王義宣爲徐州刺史戊午立錢署鑄四銖錢戊寅金墉  
城爲索虜所陷十一月癸未虎牢城復爲索虜所陷壬  
辰遣征南大將軍檀道濟北討右將軍到彥之自滑臺  
奔退十二月辛酉以南兗州刺史長沙王義欣爲豫州  
刺史司徒司馬吉翰爲司州刺史乙亥京邑火延燒太  
社北墻兗州刺史竺靈秀有罪伏誅

八年春正月庚寅於交州復立珠崖郡癸巳以左軍將  
軍申宣爲兗州刺史丁酉征南大將軍檀道濟破索虜



於東壽張二月乙卯以平北司馬韋朗爲青州刺史戊  
午以尚書右僕射江夷爲湘州刺史辛酉滑臺爲索虜  
所陷癸酉征南大將軍檀道濟引軍還丁丑青州刺史  
蕭思話棄城走以太子右衛率劉遵考爲南兗州刺史  
二月甲申車駕於延賢堂聽訟戊申詔曰自頃軍役殷  
興國用增廣資儲不給百度尚繁宜存簡約以應事實  
內外可通共詳思務令節儉夏四月甲寅以衡陽王師  
阮萬齡爲湘州刺史乙卯以後軍參軍徐遵之爲兗州  
刺史六月乙丑大赦天下己卯割江南及揚州晉陵郡  
屬南徐州江北屬兗州以徐州刺史竟陵王義宣爲南

兗州刺史司徒司馬吉翰爲徐州刺史閏月庚子詔曰  
自頃農桑惰業遊食者衆荒萊不闢督課無聞一時水  
旱便有罄匱不深存務本豐給靡因郡守賦政方畿縣  
宰親民之主宜思獎訓導以良規咸使肆力地無遺利  
耕蠶樹藝各盡其力若有力田殊衆歲竟條名列上揚  
州旱乙巳遣侍御史省獄訟申調役丙午以左軍諮議  
參軍劉道產爲雍州刺史秋八月甲辰臨川王義慶解  
尚書僕射丁未割豫州秦郡屬南兗州冬十二月罷湘  
州還并荊州

九年春三月庚戌衛將軍王弘進位太保加中書監丁

已征南大將軍江州刺史檀道濟進位司空夏四月乙亥以護軍將軍殷穆爲特進右光祿大夫建昌縣公到彥之爲護軍將軍五月壬申中書監錄尚書事衛將軍揚州刺史王弘薨六月甲戌以左軍諮議參軍申宣爲青州刺史分青州置冀州戊寅司徒南徐州刺史彭城王義康改領揚州刺史己卯以司徒參軍崔譔爲冀州刺史壬午以吐谷渾慕容延爲平東將軍吐谷渾拾虔爲平北將軍吐渾輝伐爲鎮軍將軍癸未詔曰益梁交廣境域幽遐治宜物情或多偏難可更遣大使巡求民瘼置積射彊弩將軍官乙未以征西將軍沙州刺史吐

谷渾慕容瓚爲征西大將軍西秦河二州刺史隴西王  
北秦州刺史氐楊難當加號征西將軍壬寅以撫軍將  
軍荊州刺史江夏王義恭爲征北將軍開府儀同三司  
南兗州刺史前將軍臨川王義慶爲平西將軍荊州刺  
史南兗州刺史竟陵王義宣爲中書監中軍將軍征虜  
將軍衡陽王義季爲南徐州刺史秋七月戊辰以尚書  
王仲德爲鎮北將軍徐州刺史庚午以領軍將軍殷景  
仁爲尚書僕射太子詹事劉湛爲領軍將軍壬申河南  
國西河王遣使獻方物九月妖賊趙廣寇益州陷沒郡  
縣州府討平之冬十一月壬子以少府甄法崇爲益州

刺史癸丑於廣州立宋康郡十二月甲戌以右軍參軍  
李秀之爲交州刺史庚寅立第五皇子紹爲廬陵王江  
夏王義恭子朗爲南豐縣王

十年春正月甲寅竟陵王義宣改封南譙王鎮北將軍  
徐州刺史王仲德加領兗州刺史淮南太守段宏爲青  
州刺史己未大赦天下孤老六疾不能自存者人賜穀  
五斛後將軍豫州刺史長沙王義欣進號鎮軍將軍夏  
四月戊戌青州刺史段宏加冀州刺史封陽縣侯蕭思  
話爲梁南秦二州刺史五月林邑王遣使獻方物六月  
乙亥以前青州刺史韋朗爲廣州刺史闍婆州訶羅單

國遣使獻方物秋七月戊戌曲赦益梁秦三州於益州  
立宋寧宋興二郡八月丁丑於青州立太原郡辛巳護  
軍將軍到彥之卒冬十一月氏楊難當寇漢川丁未梁  
州刺史甄法護棄城走難當據有梁州

十一年春正月亡命馬大玄羣黨數百人寇秦梁州郡  
討平之二月癸酉以交阯太守李耽之爲交州刺史夏  
四月梁秦二州刺史蕭思話破氏楊難當梁州平五月  
丁卯曲赦梁南秦二州劔閣北戊寅以大沮渠茂虔爲  
征西大將軍涼州刺史是月京邑大水六月丁未省魏  
郡是歲林邑國扶南國訶羅單國遣使獻方物

十二年春正月辛酉大赦天下辛未車駕親祠南郊癸酉封黃龍國主馮弘爲燕王夏四月乙酉尚書僕射殷景仁加中護軍丙辰詔曰周宗以寧寔由多士漢室之隆亦資得人朕寤寤樂賢爲日已久而俊哲難階明揚莫効用令遺才在野管庫虛朝永懷前載慙德深矣夫舉爾所知宣尼之篤訓貢士任官先代之成準便可宣敕內外各有薦舉當依方銓引以觀厥用是夜京郡地震六月丹陽淮南吳興義興大水京邑乘船已酉以徐豫南兗三州會稽宣城二郡米數百萬斛賜五郡遭水民是月斷酒師子國遣使獻方物秋七月乙酉闍婆娑

達國扶南國並遣使獻方物八月壬申於益州立南晉  
壽新巴西三郡乙亥原遭水郡諸逋負九月蜀郡賊張  
尋爲寇冬十一月以右軍行參軍苟道覆爲交州刺史  
十三年春正月癸丑上有疾不朝會三月己未司空江  
州刺史檀道濟有罪伏誅庚申大赦天下以中軍將軍  
南譙王義宣爲鎮南將軍江州刺史夏五月戊辰鎮北  
將軍徐兗二州刺史王仲德進號鎮北大將軍庚辰以  
征北司馬王方俛爲兗州刺史六月高麗國武都王遣  
使獻方物秋七月己未零陵王太妃薨追崇爲晉皇后  
葬以晉禮八月庚寅尚書僕射中護軍殷景仁改爲護



軍將軍九月癸丑立第二皇子濬爲始興王第三皇子諱爲武陵王

十四年春正月辛卯車駕親祠南郊大赦天下文武賜位一等孤老六疾不能自存者人賜穀五斛二月壬子以步兵校尉劉道真爲梁南秦二州刺史夏四月丁未以輔國將軍周籍之爲益州刺史秋八月戊午以尚書金部郎中徐森之爲交州刺史冬十二月辛酉停賀雪河南國西河王訶羅單國並遣使獻方物

十五年春正月丁未以平東將軍吐谷渾慕容延爲鎮西將軍秦河二州刺史夏四月甲辰燕王年遣使獻方

物立皇太子妃殷氏賜王公以下各有差己巳以倭國  
王珍爲安東將軍五月己丑特進右光祿大夫殷穆卒  
辛卯鎮北大將軍徐州刺史王仲德卒壬辰以右衛將  
軍劉遵考爲徐兗二州刺史秋七月辛未地震甲戌以  
陳南頓二郡太守徐循爲寧州刺史八月辛丑以左衛  
將軍趙伯符爲徐兗二州刺史甲寅以始興內史陸徽  
爲廣州刺史丁巳以兗州刺史王方俳爲青冀二州刺  
史是歲武都王河南國高麗國倭國扶南國林邑國竝  
遣使獻方物

十六年春正月戊寅車駕於北郊閱武庚寅司徒錄尚

書事揚州刺史彭城王義康進位大將軍領司徒餘如  
故征北將軍開府儀同三司南兗州刺史江夏王義恭  
進位司空刺史如故特進左光祿大夫王敬弘開府儀  
同三司癸巳復分荊州置湘州二月己亥以南徐州刺  
史衡陽王義季爲安西將軍荊州刺史丁未以始興王  
濬爲湘州刺史癸亥割梁州之巴西梓潼南宕梁南漢  
中南秦州之南安懷寧凡六郡屬益州分長沙江夏郡  
立巴陵郡屬湘州夏四月丁巳以鎮南將軍江州刺史  
南譙王義宣爲征北將軍南徐州刺史平西將軍臨川  
王義慶爲衛將軍江州刺史六月己酉隴西吐谷渾慕

容延改封河南王癸丑以吐谷渾拾寅爲平西將軍吐  
谷渾繁暉爲撫軍將軍秋八月庚子立第四皇子鑠爲  
南平王閏月乙未鎮軍將軍豫州刺史長沙王義欣薨  
戊戌復分豫州之淮南爲南豫州癸卯以左衛將軍劉  
遵考爲豫州刺史戊申以湘州刺史始興王濬爲南豫  
州刺史武陵王諱爲湘州刺史冬十二月乙亥皇太子  
冠大赦天下是歲武都王河南王林邑國高麗國竝遣  
使獻方物

十七年夏四月戊午朔日有蝕之五月癸巳領軍將軍  
劉湛母憂去職秋七月壬寅以征虜諮議參軍杜驥爲

青州刺史王子皇后袁氏崩八月徐兗青冀四州大水  
己未遣使檢行賑卹九月壬子葬元皇后於長寧陵冬  
十月戊午前丹陽尹劉湛有罪及同黨伏誅大赦天下  
文武賜爵一級以大將軍領司徒錄尚書揚州刺史彭  
城王義康爲江州刺史大將軍如故以司空南兗州刺  
史江夏王義恭爲司徒錄尚書事戊寅衛將軍臨川王  
義慶以本號爲南兗州刺史尚書僕射護軍將軍殷景  
仁爲揚州刺史僕射如故十一月丙戌以尚書劉義融  
爲領軍將軍秘書監徐湛之爲中護軍丁亥詔曰前所  
給揚南徐二州百姓田糧種子兗兩豫青徐諸州比年

所寬租穀應督入者悉除半今半有不收處都原之凡諸逋債優量申減又州郡估稅所在市調多有煩刻山澤之利猶或禁斷役召之品遂及稚弱諸如此比傷治害民自今咸依法令務盡優允如有不便卽依事別言不得苟趣一時以乖隱卹之旨主者明加宣下稱朕意焉癸丑尚書僕射揚州刺史殷景仁卒十二月癸亥以光祿大夫王琳爲尚書僕射戊辰以南豫州刺史始興王濬爲揚州刺史湘州刺史武陵王諱爲南豫州刺史南平王鑠爲湘州刺史是歲武都王河南王百濟國遣使獻方物

十八年春二月乙卯以豫章太守庾登之爲江州刺史  
夏五月壬申衛將軍南兗州刺史臨川王義慶征北將  
軍南徐州刺史南譙王義宣竝開府儀同三司癸巳於  
交州置宋熙郡是月沔水泛溢六月戊辰遣使巡行賑  
贍辛未領軍將軍劉義融卒秋七月戊戌以徐兗二州  
刺史趙伯符爲領軍將軍冬十月辛亥以巴東建平二  
郡太守臧質爲徐兗二州刺史乙卯省南徐州之南燕  
濮陽南廣平郡十一月戊子尚書僕射王琳卒己亥以  
丹陽尹孟顓爲尚書僕射氏楊難當又寇漢川十二月  
癸亥遣龍驤將軍裴方明與梁秦二州刺史劉真道討

之十二月晉寧太守襄松子反叛寧州刺史徐循討平之是歲肅特國高麗國蘇靡黎國林邑國竝遣使獻方物

十九年正月乙巳詔曰夫所因者本聖哲之遠教本立化成敦學之爲貴故詔以三德崇以四術用能納諸義方致之軌度盛王祖世咸必由之永初受命憲章弘遠將陶鈞庶品混一殊風有詔典司大啓庠序而頻遭屯夷未及脩建永瞻前猷思敷鴻烈今方隅乂寧戎夏慕嚮廣訓胄子實維時務便可式遵成規闡揚景業夏四月甲戌以久疾愈始奉初祠大赦天下五月庚寅梁秦



二州刺史劉真道龍驤將軍裴方明破氐楊難當仇池  
平閏月京邑雨水丁巳遣使巡行賑卹六月壬午以大  
沮渠無諱爲征西大將軍涼州刺史秋七月以梁秦二  
州刺史劉真道爲雍州刺史龍驤將軍裴方明爲梁南  
秦二州刺史甲戌晦日有融之冬十月甲申芮芮國遣  
使獻方物己亥以晉寧太守周萬歲爲寧州刺史十二  
月丙申詔曰胄子始集學業方興自微言泯絕逝將干  
祀感事思人意有慨然奉聖之盾可速議繼襲於先廟  
地特爲營造依舊給祠直令四時饗祀闕里往經寇亂  
黷校殘毀并下魯郡脩復學舍採召生徒昔之賢哲及

一介之善猶或衛其丘壟禁其芻牧況尼父德表生民  
功被百代而墳塋荒蕪荆棘弗翦可蠲墓側數戶以掌  
洒掃魯郡上民孔景等五戶居近孔子墓側蠲其課役  
供給洒掃并種松柏六百株是歲婆皇國遣使獻方物  
二十年春正月於臺城東西開萬春千秋二門二月甲  
戌江州刺史庾登之爲中護軍庚申以廣陵王紹爲江  
州刺史仇池爲索虜所沒甲申車駕於白下閱武三月  
辛亥安西將軍荊州刺史衡陽王義季進號征西大將  
軍以巴西梓潼二郡太守申坦爲梁南秦二州刺史夏  
四月甲午立第六皇子誕爲廣陵王五月癸丑中護軍

庚登之卒秋七月癸丑以楊文德爲征西將軍北秦州  
刺史封武都王辛酉以南蠻校尉蕭思話爲雍州刺史  
甲子前雍州刺史劉真道梁南秦二州刺史裴方明有  
罪下獄死八月癸未以廷尉陶愍祖爲廣州刺史冬十  
二月庚午以始興內史檀和之爲交州刺史壬午詔曰  
國以民爲本民以食爲天故一夫輟稼饑者必及倉廩  
旣實禮節以興自頃在所貧罄家無宿積賦役暫偏則  
人懷愁墊歲或不稔而病乏比室誠由政德弗孚以臻  
斯弊抑亦耕桑未廣地利多遺宰守微化道之方氓庶  
忘勤分之義永言弘濟明發載懷雖制令亟下終莫懲

勸而坐望滋殖庸可致乎有司其班宣舊條務盡敦課  
遊食之徒咸令附業考覈勤惰行其誅賞觀察能殿嚴  
加黜陟古者躬耕帝籍敬供粢盛仰瞻前王思遵令典  
便可量處千畝考卜元辰朕當親率百辟致禮郊甸庶  
幾誠素將被斯民是歲河西國高麗國百濟國倭國竝  
遣使獻方物是歲諸州郡水旱傷稼民大饑遣使開倉  
賑卹給賜糧種

二十一年春正月己亥南徐南豫州揚州之浙江西竝  
禁酒大赦天下諸逋債在十九年以前一切原除去歲  
失收者疇量申減尤弊之處遣使就郡縣隨宜賑卹凡

欲附農而種糧匱乏者竝加給貸營千畝諸統司役人  
賜布各有差戊午衛將軍臨川王義慶薨辛酉以太子  
詹事劉義宗爲南兗州刺史二月庚午以領軍將軍趙  
伯符爲豫州刺史己丑司徒錄尚書事江夏王義恭進  
位太尉領司徒庚寅以右衛將軍沈演之爲中領軍辛  
卯立第七皇子宏爲建平王甲午以廣陵王誕爲南兗  
州刺史夏四月晉陵延陵民徐耕以米千斛助卹饑民  
五月壬戌以尚書何尚之爲中護軍諮議參軍劉道錫  
爲廣州刺史六月連雨水丁亥詔曰霖雨彌日水淹爲  
患百姓積儉易致乏匱二縣官長及營署部司各隨統

檢實給其柴米必使周悉秋七月丁酉揚州刺史始興王濬加中軍將軍南豫州刺史武陵王贊加撫軍將軍乙巳詔曰比年穀稼傷損淫亢成災亦由播殖之宜尚有未盡南徐兗豫及揚州浙江西屬郡自今悉督種麥以助闕乏速運彭城下邳郡見種委刺史貸給徐豫土多稻田而民間專務陸作可符二鎮履行舊陂相率脩立并課墾闢使及來年凡諸州郡皆令盡勤地利勸導播殖蠶桑麻紵各盡其方不得但奉行公文而已八月戊辰征西大將軍荊州刺史衡陽王義季爲征北大將軍開府儀同三司南兗州刺史征北將軍徐州刺史南

譙王義宣爲車騎將軍荊州刺史南兗州刺史廣陵王  
誕爲南徐州刺史九月甲辰以大沮渠安周爲征西將  
軍涼州刺史封河西王冬十月己卯以左軍將軍徐瓊  
爲兗州刺史大將軍參軍申恬爲冀州刺史

二十二年春正月辛卯朔改用御史中丞何承天元嘉  
新歷壬辰撫軍將軍南豫州刺史武陵王諱改爲雍州  
刺史湘州刺史南平王鑠爲南豫州刺史二月辛巳以  
侍中王僧朗爲湘州刺史甲戌立第八皇子禕爲東海  
王第九皇子昶爲義陽王夏六月辛巳以南豫州刺史  
南平王鑠爲豫州刺史秋七月己未以尚書僕射孟顓

爲尚書左僕射中護軍何尚之爲尚書右僕射雍州刺史武陵王諱討緣沔蠻移一萬四千餘口於京師乙酉征北大將軍南兗州刺史衡陽王義季改爲徐州刺史九月乙未開酒禁冬十月起湖塾廢田千頃十二月乙未太子詹事范曄謀反及黨與皆伏誅丁酉免大將軍彭城王義康爲庶人庚戌以前豫州刺史趙伯符爲護軍將軍

二十三年春正月丁巳以長沙內史陸徽爲益州刺史庚申尚書左僕射孟顓去職遷漢州流民於沔次二月癸卯以左衛將軍劉義賓爲南兗州刺史三月索虜寇



堯豫青冀刺史申恬破之夏四月丁未大赦天下六月  
癸未朔日有蝕之交州刺史檀和之伐林邑國剋之秋  
七月辛未以散騎常侍杜坦爲青州刺史八月癸卯揭  
陽赭賊攻建安郡燔燒城府九月己卯車駕幸國子學  
策試諸生答問凡五十九人冬十月戊子詔曰庠序興  
立累載胄子肄業有成近親策試觀濟濟之美緬想洙  
泗永懷在昔諸生答問多可採覽教授之官竝宜沾賚  
賜帛各有差十二月丁酉以龍驤司馬蕭景憲爲交州  
刺史是歲大有年築北堤立玄武湖築景陽山於華林

園

二十四年春正月甲戌大赦天下文武賜位一等繫囚  
降宥諸逋負寬減各有差孤老六疾不能自存人賜穀  
五斛蠲建康秣陵二縣今年田租之半三月壬申護軍  
將軍趙伯符遷職夏四月甲戌青州刺史杜坦加冀州  
刺史六月京邑疫癘丙戌使郡縣及營署部司普加履  
行給以醫藥是月以貨貴制大錢一當兩秋七月乙卯  
以林邑所獲金銀寶物班賚各有差八月乙未征北大  
將軍徐州刺史衡陽王義季薨癸卯以南兗州刺史劉  
義賓爲徐州刺史九月己未以中領軍沈演之爲領軍  
將軍辛未以太子詹事徐湛之爲南兗州刺史冬十月

壬午豫章胡誕世反殺太守桓隆之前交州刺史檀和之南還至豫章因討平之壬辰以建平王宏爲中護軍十一月甲寅立第十皇子渾爲汝陰王

二十五年春正月戊辰詔曰比者冰雪經旬薪粒貴踊貧弊之室多有窳罄可檢行京邑二縣及營署賜以柴米二月庚寅詔曰安不忘虞經世之所同治兵教戰有國之恒典故服訓明恥然後少長知禁頃戎政雖脩而號令未審今宣武場始成便可剋日大習衆軍當因校獵隸武講事閏月己酉大蒐于宣武場三月庚辰車駕校獵夏四月乙巳新作闔闔廣莫二門改先廣莫門曰

承明開陽曰津陽乙卯以撫軍將軍雍州刺史武陵王  
諱爲安北將軍徐州刺史癸亥以右衛將軍蕭思話爲  
雍州刺史五月己卯罷大錢當兩六月庚戌零陵王司  
馬元瑜薨庚申安北將軍徐州刺史武陵王諱加兗州  
刺史丙寅車騎將軍荊州刺史南譙王義宣進位司空  
秋七月壬午左光祿大夫王敬弘薨八月己酉以撫軍  
參軍劉秀之爲梁南秦二州刺史甲子立第十一皇子  
諱爲淮南王九月辛未以尚書右僕射何尚之爲尚書  
左僕射領軍將軍沈演之遷職吳興太守劉遵考爲領  
軍將軍

二十六年春正月辛巳車駕親祠南郊二月己亥車駕  
陸道幸丹徒謁京陵三月丁巳詔曰朕違北京二十餘  
載雖云密邇瞻塗莫從今因四表無塵時和歲稔復獲  
拜奉舊塋展罔極之思饗讌故老申追遠之懷固以義  
兼於桑梓情加於過沛永言慷慨感慰實深宜聿宣仁  
惠覃被率土其大赦天下復丹徒縣僑舊今歲租布之  
半行所經縣蠲田租之半二千石官長竝勤勞王務宜  
有沾錫登城三戰及大將戰亡墜沒之家老病單弱者  
普加贍卹遣使巡行百姓問所疾苦孤老鰥寡六疾不  
能自存者人賜穀五斛遣使祭晉故司空忠肅公何無

忌之墓乙丑申南北沛下邳三郡復又詔曰京口肇祥  
自古著符近代衿帶江山表裏華甸經塗四達利盡淮  
海城邑高明土風淳壹苞總形勝實唯名都故能光宅  
靈心克昌帝業頃年岳牧遷回軍民徙散廬里廬宇不  
逮往日皇基舊鄉地兼蕃重宜令殷阜式崇形望可募  
諸州樂移者數千家給以田宅并蠲復五月丙寅詔曰  
吾生於此城及盧循肆亂害流茲境先帝以桑梓根本  
實同休戚復以蒙稚猥同艱難情義繾綣夷險兼備舊  
物遺蹤猶存心目歲月不居逝踰三紀時人故老與運  
零落眷惟既往倍深感歎可搜訪于時士庶文武今尚

存者具以名聞人身已亡而子孫見在優量賜賚之車  
駕水路發丹徒壬午至京師丙戌婆皇國壬辰婆達國  
竝遣使獻方物秋七月辛未以江州刺史盧陵王紹爲  
南徐州刺史廣陵王誕爲雍州刺史八月己酉以中護  
軍建平王宏爲江州刺史癸丑以南豐王朗爲湘州刺  
史冬十月廣陵王誕改封隨郡王甲辰以中軍將軍揚  
州刺史始興王濬爲征北將軍開府儀同三司南徐兗  
二州刺史南徐州刺史盧陵王紹爲揚州刺史

二十七年春正月辛未制交寧二州假板郡縣俸祿聽  
依臺除辛卯百濟國遣使獻方物二月辛丑右將軍豫

州刺史南平王鑠進號平西將軍辛巳索虜寇汝南諸郡陳頓二郡太守鄭琨汝陽潁川二郡太守郭道隱委守走索虜攻懸瓠城行汝南郡事陳憲拒之以軍興減百官俸三分之一三月乙丑淮南太守諸葛闡求減俸祿同內百官於是州及郡縣丞尉並悉同減戊寅罷國子學乙酉以新除吏部尚書蕭思話爲護軍將軍夏四月壬子安北將軍徐兗二州刺史武陵王贊降號鎮軍將軍六月丁酉侍中蕭斌爲青冀二州刺史秋七月庚午遣寧朔將軍王玄謨北伐太尉江夏王義恭出次彭城總統諸軍乙亥索虜碣磔戍委城走冬閏月癸亥立



漢攻滑臺不克爲虜所敗退還碣磔辛未雍州刺史隨  
王誕遣軍攻弘農城克之丙戌又克關城十一月戊子  
索虜陷鄒山魯陽平二郡太守崔邪利沒甲午隨王誕  
所遣軍又攻陝城克之癸卯左軍將軍劉康祖於壽陽  
尉武戌與虜戰敗見殺丁未大赦天下十二月戊午內  
外戒嚴乙丑冗從僕射胡崇之太子積弩將軍臧澄之  
建威將軍毛熙祚於盱眙與虜戰敗竝見殺庚午虜僞  
主率大衆至瓜步壬午內外戒嚴

二十八年春正月丙戌朔以寇逼不朝會丁亥索虜自  
瓜步退走丁酉攻圍盱眙城是月寧朔將軍王玄謨自

稿礮退還歷下二月丙辰索虜自盱眙奔走癸酉詔曰  
獫狁孔熾難及數州睠言念之寤寐興悼凶羯瘡挫迸  
跡遠奔彫傷之民宜時振理凡遭寇賊郡縣令還復居  
業封屍掩骼賑贍饑流東作方始務盡勸課貸給之宜  
事從優厚其流寓江淮者竝聽卽屬并蠲復稅調甲戌  
太尉領司徒江夏王義恭降爲驃騎將軍開府儀同三  
司辛巳鎮軍將軍徐兗二州刺史武陵王諱降號北中  
郎將壬午車駕幸瓜步是日解嚴三月乙酉車駕還宮  
壬辰征北將軍始興王濬解南兖州庚子以輔國將軍  
臧質爲雍州刺史戊申徐州刺史武陵王諱爲南兖州

刺史甲寅護軍將軍蕭思話爲撫軍將軍徐兗二州刺

史夏四月癸酉婆達國遣使獻方物索虜僞寧南將軍

魯爽中書郎魯秀歸順戊寅以爽爲司州刺史五月乙

酉亡命司馬順則自號齊王據梁鄒城丁巳婆皇國戊

戌河南王竝遣使獻方物己巳驃騎將軍江夏王義恭

領南兗州刺史戊申以尚書左僕射何尚之爲尚書令

太子詹事徐湛之爲尚書僕射護軍將軍壬子以後將

軍隨王誕爲安南將軍廣州刺史六月壬戌以北中郎

將武陵王諱爲江州刺史以振武將軍秦郡太守劉興

祖爲青冀二州刺史秋七月甲辰安東將軍倭王倭濟

進號安東大將軍八月癸亥梁鄒平斬司馬順則冬十月癸亥高麗國遣使獻方物十一月壬寅曲赦二兗徐豫青冀六州是冬徙彭城流民於瓜步淮西流民於姑熟合萬許家

二十九年春正月甲午詔曰經寇六州居業未能仍值災澇饑困荐臻可速符諸鎮優量救卹今農事行興務盡地利若須田種隨宜給之二月庚申虜帥拓跋燾死庚午立第十二皇子休仁爲建安王夏四月戊午訶羅單國遣使獻方物以驃騎參軍張永爲冀州刺史五月甲午罷湘州并荊州以始興臨賀始安三郡屬廣州丙

申詔曰惡稔身滅戎醜常數虐虜窮凶著於自昔未勞  
資斧已伏天誅子孫相殘親黨離貳關洛僞帥竝懷內  
款河朔遺民注誠請効拯溺蕩穢今其會也可符驃騎  
司空二府各部分所統東西應接歸義建績者隨勞酬  
獎是月京邑雨水六月己酉遣部司巡行賜樵米給船  
撫軍將軍蕭思話率衆北伐以征北從事中郎劉瑀爲  
益州刺史秋七月壬辰汝陰王渾改封武昌王淮陽王  
諱改封湘東王丁酉省大司農太子僕廷尉監官八月  
丁卯蕭思話攻碣礮不拔退還九月丁亥以平西將軍  
吐谷渾拾寅爲安西將軍秦河二州刺史己丑撫軍將

軍徐兗二州刺史蕭思話加冀州刺史兗州如故冬十月癸亥司州刺史魯爽攻虎牢不拔退還十一月壬寅揚州刺史廬陵王紹薨十二月辛未以驃騎將軍南兗州刺史江夏王義恭爲大將軍南徐州刺史錄尚書事如故

三十年春正月戊寅以司空荊州刺史南譙王義宣爲司徒中軍將軍揚州刺史以南兗州并南徐州庚辰以領軍將軍劉遵考爲平西將軍豫州刺史壬午以征北將軍南徐州刺史始興王濬爲衛將軍荊州刺史戊子江州刺史武陵王諱統衆軍伐西陽蠻癸巳以豫州刺

史南平王鑠爲撫軍將軍領軍將軍青徐州饑二月壬子遣運部賑卹甲子上崩子含章殿時年四十七諡曰景皇帝廟曰中宗三月癸巳葬長寧陵世祖踐祚追改諡及廟號

史臣曰太祖幼年特秀顧無保傅之嚴而天授和敏之姿自稟君人之德及正位南面歷年長久綱維備舉條禁明密罰有恒科爵無濫品故能內清外晏四海謚如也昔漢氏東京常稱建武永平故事自茲厥後亦每以元嘉爲言斯固盛矣授將遣帥乖分闡之命才謝光武而遙制兵略至於攻日戰時莫不仰聽成旨雖覆師喪

旅將非韓白而延寇感境抑此之由及至言漏衾衽難  
結商豎雖禍生非慮蓋亦有以而然也嗚呼哀哉



宋書卷五

宋書卷五考證

文帝紀以吐谷渾慕容延爲平東將軍○平東各本皆訛東平今據下文十五年作平東將軍及鮮卑傳改正慕容延鮮卑傳作慕延

以大沮渠茂虔爲征西大將軍涼州刺史○茂虔魏書作牧犍

婆皇國遣使獻方物○婆夷蠻傳作婆皇監本誤黃許慎說文有嬖字徐鉉云嬖俗作婆若婆皇國屢獻方物自文帝十七年以後其字皆作皇不應此年獨用黃字今改正

豫章胡誕世反○誕諸本皆訛延今據彭城王義康傳  
及胡藩傳改正

安不忘虞經世之所同○虞一本作危

當因校獵隸武講事○隸當作肆

史臣論難結商豎○商一本作凶

宋書卷五考證

宋書卷六

梁

沈

約

撰

本紀第六

孝武帝

世祖孝武皇帝諱駿字休龍小字道民文帝第三子也  
元嘉七年秋八月庚午生十二年立爲武陵王食邑二  
千戶十六年都督湘州諸軍事征虜將軍湘州刺史領  
石頭戍事十七年遷使持節都督南豫豫司雍并五州  
諸軍事南豫州刺史將軍如故猶戍石頭二十一年加  
督秦州進號撫軍將軍明年徙都督雍梁南北秦四州

荆州之襄陽竟陵南陵順陽新野隨六郡諸軍事寧蠻  
校尉雍州刺史持節將軍如故自晉氏江左以來襄陽  
未有皇子重鎮時太祖欲經略關河故有此授尋給鼓  
吹一部二十五年改授都督南兖徐兖青冀幽六州豫  
州之梁郡諸軍事安北將軍徐州刺史持節如故北鎮  
彭城尋領兖州刺史始興王濬爲南兖州上解督南兖  
二十七年坐汝陽戰敗降號鎮軍將軍又以索虜南侵  
降爲北中郎將二十八年進督南兖州南兖州刺史當  
鎮山陽尋遷都督江州荊州之江夏豫州之西陽晉熙  
新蔡四郡諸軍事南中郎將江州刺史持節如故時緣

江蠻爲寇太祖遣太子步兵校尉沈慶之等伐之使上  
總統衆軍三十年正月上出次西陽之五洲會元凶弒  
逆以上爲征南將軍加散騎常侍上率衆入討荊州刺  
史南譙王義宣雍州刺史臧質並舉義兵四月辛酉上  
次溧洲癸亥冠軍將軍柳元景前鋒至新亭修建營壘  
甲子賊劬親率衆攻元景大敗退走丙寅上次江寧丁  
卯大將軍江夏王義恭來奔奉表上尊號戊辰上至于  
新亭己巳卽皇帝位大赦天下文武賜爵一等從軍者  
二等賊汚清議悉皆盪除高年鰥寡孤幼六疾不能自  
存人賜穀五斛逋租宿債勿復收長徒之身優量降宥

崇改太祖號諡以大將軍江夏王義恭爲大尉錄尚書  
六條事南徐州刺史庚午以荊州刺史南譙王義宣爲  
中書監丞相錄尚書六條事揚州刺史安東將軍隨王  
誕爲衛將軍開府儀同三司荊州刺史雍州刺史臧質  
爲車騎將軍開府儀同三司江州刺史征虜將軍沈慶  
之爲領軍將軍撫軍將軍兗冀二州刺史蕭思話爲尚  
書左僕射壬申以征虜將軍王僧達爲尚書右僕射改  
新亭爲中興亭五月甲戌輔國將軍申坦克京城乙亥  
輔國將軍朱修之克東府丙申克定京邑劭及始興王  
濬諸同逆並伏誅庚辰詔曰天步艱難國道用否雖基

構永固而氣數時愆朕以眇身奄承皇業奉尋歷命鑒  
寐震懷萬邦風政人治之本感念陵替若疚在心可分  
遣大使巡省方俗是日解嚴辛巳車駕幸東府城甲申  
尊所生路淑媛爲皇太后乙酉立妃王氏爲皇后戊子  
以左衛將軍柳元景爲雍州刺史壬辰以太尉江夏王  
義恭爲太傅領大司馬甲午曲赦京邑二百里內并蠲  
今年租稅戊戌以撫軍將軍南平王鑠爲司空建平王  
宏爲尚書左僕射東海王禕爲撫軍將軍新除尚書左  
僕射蕭思話遷職六月壬寅以驃騎參軍垣護之爲冀  
州刺史甲辰以山陽太守申恬爲青州刺史丙午車駕



還宮初置殿門及上閤屯兵以江夏內史朱修之爲平西將軍雍州刺史御史中丞王曇生爲廣州刺史戊申以新除雍州刺史柳元景爲護軍將軍己酉以司州刺史魯爽爲南豫州刺史庚戌以梁南秦二州刺史劉秀之爲益州刺史太尉司馬龐秀之爲梁南秦二州刺史衛軍司馬徐遺寶爲兖州刺史寧朔將軍王玄謨爲徐州刺史衛將軍隨王誕進號驃騎大將軍尚書右僕射王僧達遷職丹陽尹褚湛之爲尚書右僕射丙辰以侍中南譙王世子恢爲湘州刺史丁亥詔曰興王立訓務弘治節輔臣佐時勤獻政要仰惟聖規每存茲道猥以

眇躬屬承景業闡揚遺澤無廢厥心夫量入爲出邦有恒典而經給之宜多違常度兵役糜耗府藏散減外內衆供未加損約非所以聿遵先旨敬奉遺圖自今諸可薄已厚民去煩從簡者悉宜施行以稱朕意庚申詔有司論功班賞各有差辛酉安西將軍西秦河二州刺史吐谷渾拾寅進號鎮西大將軍開府儀同三司庚午還分南徐立南兗州辛未改封南譙王義宣爲南郡王隨王誕爲竟陵王義宣次子宜陽侯愷爲宜陽縣王閏月壬申以領軍將軍沈慶之爲鎮軍將軍南兗州刺史癸酉以護軍將軍柳元景爲領軍將軍丙子遣兼散騎常

侍樂詢等十五人巡行風俗甲申蠲尋陽西陽郡租布  
三年甲午丞相南郡王義宣改爲荆湘二州刺史驃騎  
大將軍荊州刺史竟陵王誕改爲揚州刺史南蠻校尉  
王僧達爲護軍將軍是月置衛尉官秋七月辛丑朔日  
有蝕之甲寅詔曰世道未夷惟憂在國夫使羣善畢舉  
固非一才所議况以寡德屬衰薄之期夙宵寅想永懷  
待旦王公卿士凡有嘉謀善政可以維風訓俗咸達乃  
誠無或依隱辛酉詔曰百姓勞弊徭賦尚繁言念未乂  
宜崇約損凡用非軍國宜悉停功可省細作并尚方雕  
文靡巧金銀塗飾事不關實嚴爲之禁供御服膳減除

遊侈水陸捕採各順時日官私交市務令優衷其江海  
田池公家規固者詳所開弛貴戚競利悉皆禁絕戊戌  
以右衛將軍宗慤爲廣州刺史己巳司空南平王鑠薨  
八月辛未武皇帝舊役軍身嘗在齋內人身猶存者普  
賜解戶乙亥尚書左僕射建平王宏加中書監中軍將  
軍丁亥以沛郡太守垣閎爲寧州刺史撫軍司馬費沈  
爲梁南秦二州刺史甲午護軍將軍王僧達遷職九月  
丁巳以前尚書劉義綦爲中護軍壬戌新亭戰亡者復  
同京城劭黨南海太守蕭簡據廣州反丁卯輔國將軍  
鄧琬討平之冬十月癸未車駕於闕武堂聽訟十一月

丙午以左軍將軍魯秀爲司州刺史丙辰停臺省衆官朔望問訊丙寅高麗國遣使獻方物十二月甲戌省都水臺罷都水使者官置水衡令官癸未以將置東宮省太子率更令步兵翊軍校尉旅賁中郎將冗從僕射左右積弩將軍官中庶子中舍人庶子舍人洗馬各減舊員之半

孝建元年春正月己亥朔車駕親祠南郊改元大赦天下壬寅以丹陽尹蕭思話爲安北將軍徐州刺史甲辰護軍將軍劉義綦遷職以尚書令何尚之爲左光祿大夫護軍將軍戊申詔曰首食尚農經邦本務貢士察行

寧朝當道內難甫康政訓未洽衣食有仍耗之弊選造  
無觀國之美昔衛文勤民高宗恭默卒能收賢巖穴大  
殷季年朕每側席疚懷無忘鑒寐凡諸守蒞親民之官  
可詳申舊條勸盡地利力田善蓄者在所具以名聞褒  
甄之科精爲其格四方秀孝非才勿舉獻答允值卽就  
銓擢若止無可採猶賜除署若有不堪酬奉虛竊榮薦  
遣還田里加以禁錮尚書百官之元本庶績之樞機丞  
郎列曹局司有在而頃事無巨細悉歸令僕非所以衆  
材成構羣能濟業者也可更明體制咸責厥成糾覈勤  
惰嚴施賞罰壬戌更鑄四銖錢丙寅立皇子子業爲皇

太子賜天下爲父後者爵一級孝子順孫義夫節婦粟帛各有差是月起正光殿二月庚午豫州刺史魯爽車騎將軍江州刺史臧質丞相荊州刺史南郡王義宣兗州刺史徐遺寶舉兵反乙亥撫軍將軍東海王禧遷職己卯領軍將軍柳元景加撫軍將軍壬午曲赦豫州辛卯左衛將軍王玄謨爲豫州刺史癸巳玄謨進據梁山丙申以安北司馬夏侯祖歡爲兗州刺史三月癸亥內外戒嚴辛丑以安北將軍徐州刺史蕭思話爲安南將軍江州刺史撫軍將軍柳元景卽本號爲雍州刺史癸卯以太子左衛率龐秀之爲徐州刺史徐遺寶爲夏侯

祖歡所破棄衆走丙寅以輔國長史明盾爲冀州刺史  
夏四月戊辰以後將軍劉義綦爲湘州刺史甲申以平  
西將軍雍州刺史朱修之爲安西將軍荊州刺史丙戌  
鎮軍將軍南兖州刺史沈慶之大破魯爽於歷陽之小  
峴斬爽癸巳進慶之號鎮北大將軍封第十六皇弟休  
倩爲東平王未拜薨五月甲寅義宣等攻梁山王玄謨  
大破之己未解嚴癸亥以吳興太守劉延孫爲尚書右  
僕射六月戊辰臧質走至武昌爲人所斬傳首京師甲  
戌撫軍將軍柳元景進號撫軍大將軍鎮北大將軍沈  
慶之並開府儀同三司丙子以征西將軍武昌王渾爲



雍州刺史癸未分揚州立東揚州分荆湘江豫州立郢  
州罷南蠻校尉戊子省錄尚書事庚寅義宣於江陵賜  
死秋七月丙申朔日有蝕之丙辰大赦天下文武賜爵  
一級逋租宿債勿復收辛酉於雍州立建昌郡以會稽  
太守義陽王昶爲東揚州刺史八月庚午撫軍大將軍  
柳元景復爲領軍將軍本號如故壬申以游擊將軍垣  
護之爲徐州刺史壬辰以安西司馬梁坦爲梁南秦二  
州刺史九月丙申以彊弩將軍尹懷順爲寧州刺史丁  
酉左光祿大夫何尚之解護軍將軍甲辰加尚之特進  
丙午以安南將軍江州刺史蕭思話爲鎮西將軍郢州

刺史冬十月戊寅詔曰仲尼體天降德維周興漢經緯  
三極冠冕百王爰自前代咸加褒述典司失人用闕宗  
祀先朝遠存遺範有詔繕立世故妨道事未克就國難  
頻深忠勇奮厲實憑聖義大教所敦永惟兼懷無忘待  
旦可開建廟制同諸侯之禮詳擇爽塏厚給祭秩丁亥  
以秘書監東海王禕爲撫軍將軍江州刺史於郢州立  
安陸郡十一月癸卯復立都水臺置都水使者官是歲  
始課南徐州僑民租

二年正月壬寅以冠軍將軍湘東王諱爲中護軍二月  
己丑婆皇國遣使獻方物丙寅以鎮北大將軍南兖州

刺史沈慶之爲左光祿大夫開府儀同三司辛巳以尚書右僕射劉延孫爲南兗州刺史三月辛亥以吳興太守劉遵考爲湘州刺史壬子以行征西將軍楊文智爲征西將軍北秦州刺史夏四月壬申河南國遣使獻方物壬午以豫章太守檀和之爲豫州刺史五月戊戌以湘州刺史劉遵考爲尚書右僕射前軍司馬垣闕爲交州刺史庚子以輔國將軍申坦爲徐兗二州刺史癸卯以右衛將軍顧覲之爲湘州刺史丁未以金紫光祿大夫王偃爲右光祿大夫六月甲子以國哀除釋大赦天下庚辰以曲江縣侯王玄謨爲豫州刺史秋七月癸巳

立第十三皇弟休祐爲山陽王第十四皇弟休茂爲海陵王第十五皇弟休業爲鄱陽王戊戌鎮西將軍蕭思話卒己酉以益州刺史劉秀之爲郢州刺史槃槃國遣使獻方物甲寅以義興太守到元度爲益州刺史八月庚申離州刺史武昌王渾有臯廢爲庶人自殺辛酉以南兗州刺史劉延孫爲鎮軍將軍離州刺史斤陀利國遣使獻方物三吳民饑癸酉詔所在賑貸丙子詔曰諸苑禁制綿遠有妨肆業可詳所開弛假與貧民壬午以新除豫州刺史王玄謨爲青冀二州刺史青州刺史申恬爲豫州刺史甲申以右衛將軍檀和之爲南兗州刺

史九月丁亥車駕於軍武場閱武庚戌詔曰國道再屯  
艱虞畢集朕雖寡德終膺鴻慶惟新之祉寔深百王而  
惠宥之令未殊常渥永言勤慮寤寐載懷在朕受命之  
前凡以臯徙放悉聽還本犯釁之門尚有存者子弟可  
隨才署吏冬十月壬午太傅江夏王義恭領揚州刺史  
驃騎大將軍揚州刺史竟陵王誕爲司空南徐州刺史  
中書監尚書左僕射中軍將軍建平王宏爲尚書令將  
軍如故十月戊子中護軍湘東王諱遷職鎮軍將軍劉  
延孫爲護軍將軍青冀二州刺史王玄謨爲雒州刺史  
甲午以大司馬垣護之爲青冀二州刺史辛亥高麗國

遣使獻方物十二月癸亥以前交州刺史蕭景憲爲交州刺史

三年春正月庚寅立第十八皇弟休範爲順陽王第十  
九皇弟休若爲巴陵王戊戌立第二皇子子尚爲西陽  
王辛丑車駕親祠南郊壬子立皇太子妃何氏甲寅大  
赦天下二月癸亥右光祿大夫王偃卒甲子以廣州刺  
史宗慤爲平西將軍豫州刺史丁卯以新除御史中丞  
王翼爲廣州刺史丁丑始制朔望臨西堂接羣下受奏  
事壬午內外官有田在近道聽遣所給吏僮附業三月  
癸丑以西陽王子尚爲南兖州刺史閏月戊午尚書右

僕射劉遵考遷職癸酉鄱陽王休業薨庚辰停元嘉三  
十年以前兵工考剔夏五月辛酉制荆徐兗豫雍青冀  
七州統內家有馬一匹者蠲復一丁壬戌以右衛將軍  
劉瑀爲益州刺史六月上於華林園聽訟秋七月太傅  
江夏王義恭解揚州丙子以南兖州刺史西陽王子尚  
爲揚州刺史秘書監建安王休仁爲南兖州刺史八月  
戊戌以北軍中郎諮議參軍費淹爲交州刺史丁未以  
尚書吏部王琨爲廣州刺史九月壬戌以丹陽尹劉遵  
考爲尚書左僕射冬十月癸未以尋陽太守張悅爲益  
州刺史丙午太傅江夏王義恭進位太宰領司徒丁未

領軍將軍柳元景加驃騎將軍尚書令建平王宏加中書監衛將軍撫軍將軍江州刺史東海王禕進號平南將軍十一月癸丑淮南太守袁景有臯棄市十二月丙午以侍中孔靈符爲郢州刺史

大明元年春正月辛亥朔改元大赦天下賜高年孤疾粟帛各有差庚午護軍將軍劉延孫遷職右衛將軍湘東王諱爲中護軍京邑雨水辛未遣使檢行賜以樵米二月己亥復親民職公田索虜寇兗州三月壬戌制大臣加班劔者不得入宮城門梁州獠求內屬立懷漢郡夏四月京邑疾疫丙申遣使按行賜給醫藥死而無收



敘者官爲敘埋庚子省湘州宋建郡并臨賀五月吳興  
義興大水民饑乙卯遣使開倉賑卹癸酉於華林園聽  
訟乙亥以左衛將軍沈曇慶爲徐州刺史輔國將軍梁  
瑾葱爲河州刺史宕昌王六月己卯以前太子步兵校  
尉劉祇子歆繼南豐王朗辛巳以長水校尉山陽王休  
祐爲東揚州刺史丁亥休祐改爲湘州刺史以丹陽尹  
顏竣爲東揚州刺史秋七月辛未土斷離州諸僑郡縣  
八月戊戌於兗州立陽平郡壬寅於華林園聽訟甲辰  
司空南徐州刺史竟陵王誕改爲南兗州刺史太子詹  
事劉延孫爲鎮軍將軍南徐州刺史冬十月丙申詔曰

旒纁之道有孚於結繩日昃之勤已切於姬后况世弊  
教淺歲月澆季朕雖勩力寓內未明求衣而識狹前王  
務廣昔代永言菲德其愧良深朝咨野怨自達者寡惠  
民利公所昧寔衆自今百辟庶尹下民賤隸有懷誠抱  
志擁鬱衡閭失理負謗未聞朝聽者皆聽躬自申奏小  
大以聞朕因聽政之日親對覽焉甲辰以百濟王餘慶  
爲鎮東大將軍十二月丁亥順陽王休範改封桂陽王  
戊戌於華林園聽訟

二年春正月辛亥車駕祀南郊壬子詔曰去歲東土多  
經水災春務已及宜加優課糧種所須以時貸給丙辰

復郡縣田秩并九親祿俸壬戌詔曰先帝靈命初興龍  
飛西楚歲紀浸遠感往纏心奉迎文武情深常隸思弘  
殊澤以申永懷吏身可賜爵一級軍戶免爲平民二月  
丙子詔曰政道未著俗弊尚深豪侈兼并貧弱困窘存  
闕衣裳沒無斂樸朕甚傷之其明敕守宰勤加存卹賻  
贈之科速爲條品乙酉以金紫光祿大夫褚湛之爲尚  
書左僕射丙戌中書監尚書令衛將軍建平王宏以本  
號開府儀同三司中書監如故丁酉驃騎將軍柳元景  
以本號開府儀同三司甲辰散騎常侍義陽王昶爲中  
軍將軍三月丁未中書監尚書令衛將軍建平王宏薨

乙卯以田農要月大官停殺牛丁卯上於華林園聽訟  
癸酉以寧朔將軍劉季之爲司州刺史夏四月甲申立  
皇子子綏爲安陸王甲午以海陵王休茂爲雍州刺史  
辛丑地震五月戊申復西陽郡六月戊寅增置吏部尚  
書一人省五兵尚書丁亥左光祿大夫何尚之加開府  
儀同三司戊子以金紫光祿大夫羊玄保爲右光祿大  
夫丙申詔曰往因師旅多有逋亡或連山染逆懼致軍  
憲或辭役憚勞苟免刑罰雖約法從簡務思弘宥恩令  
驟下而逃伏猶多豈習愚爲性忸惡難反將在所長吏  
宣導乖方可普加寬申咸與更始秋七月甲辰彭城民

高闡等謀反伏誅癸亥以右衛將軍顏師伯爲青冀二州刺史八月乙酉河南王遣使獻方物丙戌中書令王僧達有罪下獄死己丑以彊弩將軍杜叔文爲寧州刺史交州刺史費淹爲廣州刺史南海太守垣闓爲交州刺史甲午以寧朔將軍沈僧榮爲兗州刺史九月癸卯於華林園聽訟壬戌以寧朔將軍劉道隆爲徐州刺史襄陽大水遣使通行賑贍庚午置武衛將軍武騎常侍官冬十月甲午以中軍將軍義陽王昶爲江州刺史乙未高麗國遣使獻方物十一月壬子揚州刺史西陽王子尚加撫軍將軍十二月己亥諸王及妃主庶姓位從

公者喪事聽設凶門餘悉斷閏月庚子詔曰夫山處巖  
居不以魚鼈爲禮頃歲多虞軍調繁切違方設賦本濟  
一時而主者玩習遂爲常典柁櫓瑤琨任土作貢積羽  
羣輕終致深弊永言弘革無替朕心凡寰衛貢職山淵  
採捕皆當詳辨產殖考順歲時勿使牽課虛懸睽忤氣  
序庶簡約之風有孚於品性惠敏之訓無漏於幽仄庚  
申上於華林園聽訟壬戌林邑國遣使獻方物是冬索  
虜寇青州刺史顏師伯頻大破之

三年春正月丁亥割豫州梁郡屬徐州己丑以驃騎將  
軍領軍將軍柳元景爲尚書令尚書右僕射劉遵考爲

領軍將軍丙申婆皇國遣使獻方物二月乙卯以揚州所統六郡爲王畿以東揚州隸揚州時欲立司隸校尉以元凶已立乃止撫軍將軍揚州刺史西陽王子尚徙爲揚州刺史甲子復置廷尉監官荊州饑三月甲申原田租布各有差庚寅以義興太守垣閬爲兖州刺史壬辰中護軍湘東王諱遷職以中書令東海王禕爲衛將軍護軍將軍癸巳太宰江夏王義恭加中書監夏四月癸卯上於華林園聽訟丙午以建寧太守苻仲子爲寧州刺史乙卯司空南兖州刺史竟陵王誕有罪貶爵誕不受命據廣陵城反殺兖州刺史垣閬以始興公沈慶

之爲車騎大將軍開府儀同三司南兗州刺史討誕甲  
子上親御六師車駕出頓宣武堂司州刺史劉季之反  
叛徐州刺史劉道隆討斬之秋七月己巳尅廣陵城斬  
誕悉誅城內男丁以女口爲軍賞是日解嚴辛未大赦  
天下尚方長徒奚官奴婢老疾者悉原放孝子順孫義  
夫節婦賜粟帛各有差王畿下貧之家與近行頓所由  
並蠲租一年丙子以丹陽尹劉秀之爲尚書右僕射丙  
戌分淮南北復置二豫州以新除車騎大將軍開府儀  
同三司南兗州刺史沈慶之爲司空刺史如故戊子以  
衛將軍護軍將軍東海王禕爲南豫州刺史衛將軍如



故江州刺史義陽王昶爲護軍將軍冠軍將軍桂陽王  
休範爲江州刺史癸巳以前左衛將軍王玄謨爲郢州  
刺史八月丙申詔曰近北討文武於軍亡沒或殞身矢  
石或癘疾死亡並盡勤王事而斂樁卑薄可普更賻給  
務令豐厚己酉以車騎長史庾深之爲豫州刺史甲子  
詔曰昔姬道方凝刑法斯厝漢德初明犴圜用簡良由  
上一其道下淳其性今民澆俗薄誠淺僞深重以寡德  
弗能心化故知方者尠趣辟寔繁向因巡覽見二尚方  
徒隸嬰金屬校既有矜復加國慶民和獨隔凱澤益以  
慙焉可詳所原宥九月己巳詔曰夫五辟三刺自古所

難巧法深文在季彌甚故泐情察訟魯師致捷市獄勿  
擾漢史飛聲廷尉遠邇疑讞平決攸歸而一蹈幽圜動  
逾時歲民嬰其困吏容其私自今囚至辭具並卽以聞  
朕當悉詳斷庶無留獄若繁文滯劾證逮遐廣必須親  
察以盡情狀自後依舊聽訟壬辰於玄武湖北立上林  
苑冬十月丁酉詔曰古者薦鞠青壇聿祈多慶分藹玄  
郊以供純服來歲可使六宮妃嬪修親桑之禮庚子鎮  
軍將軍南徐州刺史劉延孫進號車騎將軍戊申河西  
國遣使獻方物庚戌以河西王大沮渠安周爲征虜將  
軍涼州刺史十一月己巳高麗國遣使獻方物肅慎國

重譯獻楛矢石柝西域獻舞馬十二月戊午上於華林園聽訟辛酉置謁者僕射官

四年春正月辛未車駕祠南郊甲戌宕昌王奉表獻方物乙亥車駕躬耕藉田大赦天下尚方徒繫及逋租宿債大明元年以前一皆原除力田之民隨才敘用孝悌義順賜爵一級孤老貧疾人穀十斛藉田職司優沾普賚百姓乏糧種隨宜貸給吏宣勸有章者詳加褒進壬午以北中郎司馬柳叔仁爲梁南秦二州刺史左將軍荊州刺史朱修之進號鎮軍將軍庚寅立第三皇子子勛爲晉安王第六皇子子房爲尋陽王第七皇子子頊

爲歷陽王第八皇子子鸞爲襄陽王二月庚子侍中建  
安王休仁爲湘州刺史己未以員外散騎侍郎費景緒  
爲寧州刺史三月甲子以冠軍將軍巴陵王休若爲徐  
州刺史丁卯以安陸王子綏爲郢州刺史癸酉以徐州  
刺史劉道隆爲青冀二州刺史索虜寇北陰平孔堤太  
守揚歸子擊破之甲申皇后親桑于西郊夏四月癸卯  
以南琅邪隸王畿丙午詔曰昔紱衣御寓貶甘示節土  
簋臨天飭儉昭度朕綈帛之念無忘于懷雖深詔有司  
省游務實而歲用兼積年量虛廣豈以捐豐從損允稱  
約心四時供限可詳減太半庶裘絺順典有偃民華纂

組傷工無競壘市辛酉詔曰都邑節氣未調癘疫猶衆  
言念民瘼情有矜傷可遣使存問并給醫藥其死亡者  
隨宜卹贍五月庚辰於華林園聽訟乙酉以徐州之梁  
郡還屬豫州丙戌尚書左僕射褚湛之卒以撫軍長史  
劉思考爲益州刺史庚寅以南下邳併南彭城郡秋七  
月甲戌左光祿大夫開府儀同三司何尚之薨八月壬  
寅宕昌王遣使獻方物己酉以晉安王子勛爲南兖州  
刺史雍州大水甲寅遣軍部賑給九月辛未以冠軍將  
軍垣護之爲豫州刺史甲申上於華林園聽訟丁亥改  
封襄陽王子鸞爲新安王冬十月庚寅遣新除司空沈

慶之討沿江蠻壬辰制郡縣減祿並先充公限十一月  
戊辰改細作署令爲左右御府令丙戌復置大司農官  
十二月乙未上於華林園聽訟辛巳車駕幸廷尉寺凡  
囚繫咸悉原遣索虜遣使請和丁未車駕幸建康縣原  
放獄囚倭國遣使獻方物

五年春正月丁卯以宕昌王梁唐子爲河州刺史二月  
癸巳車駕閱武詔曰昔人稱人道何先於兵爲首雖淹  
紀勿用忘之必危朕以聽覽餘閒因時講事坐作有儀  
進退無爽軍幢以下普量班錫頃化弗能孚而民未知  
禁道役違調起觸刑網凡諸逃亡在今昧爽以前悉皆

原赦已滯囹圄者釋還本役其逋負在大明三年以前  
一賜原停自此以還鰥貧疾老詳所申減伐蠻之家蠲  
租稅之半近籍改新制在所承用殊謬寔多可普更符  
下聽以今爲始若先已犯制亦同蕩然甲寅加右光祿  
大夫羊玄保特進夏四月癸巳改封西陽王子尚爲豫  
章王丙申加尚書令柳元景左光祿大夫開府儀同三  
司戊戌詔曰南徐兗二州去歲水潦傷年民多困窶逋  
租未入者可申至秋登丙午雍州刺史海陵王休茂殺  
司馬庾深之舉兵反義成太守薛繼考討斬之甲寅以  
第九皇子子仁爲雍州刺史五月癸亥制帝室葑親朝

官非祿官者月給錢十萬丙辰車駕幸閱武堂聽訟六月丙午以護軍將軍義陽王昶爲中軍將軍壬子分廣陵置沛郡省東平郡并廣陵秋七月丙辰詔曰雨水猥降街衢泛溢可遣使巡行窮弊之家賜以薪粟丁卯高麗國遣使獻方物庚午曲赦雍州八月戊子立第九皇子子仁爲永嘉王第十一皇子子真爲始安王以北中郎參軍費伯弘爲寧州刺史己丑詔曰自靈命初基聖圖重遠參正樂職感神明之應崇殖禮囿奮至德之光聲寔同和文以均節化調其俗物性其情故臨經式奠煥乎炳發道喪世屯學落年永獄訟微衰息之術百姓



忘退素之方今息警夷嶂恬波河渚棧山航海鄉風慕  
義化民成俗茲時篤矣來歲可修葺庠序旌延國胄庚  
寅制方鎮所假白板郡縣年限依臺除食祿三分之一  
不給送故衛將軍東海王禕以本號開府儀同三司九  
月甲寅朔日有食之丁卯行幸琅邪郡囚繫悉原遣甲  
戌移南豫州治淮南于湖縣丁丑以冠軍將軍尋陽王  
子房爲南豫州刺史閏月戊子皇太子妃何氏薨丙申  
初立馳道自閶闔門至于朱雀門又自承明門至于玄  
武湖壬寅改封歷陽王子頊爲臨海王冬十月甲寅以  
車騎將軍南徐州刺史劉延孫爲尚書左僕射領護軍

將軍尚書右僕射劉秀之爲安北將軍讎州刺史以冠軍將軍臨海王子頊爲廣州刺史乙卯以東中郎將新安王子鸞爲南徐州刺史十一月壬辰詔曰王畿內奉京師外表衆夏民殷務廣宜思簡惠可遣尚書就加詳檢并與守宰平治庶獄其有疑滯具以狀聞丁酉增置少府丞一人十二月壬申以領軍將軍劉遵考爲尚書右僕射甲戌制天下民戶歲輸布四疋庚辰以太常王玄謨爲北平將軍徐州刺史

六年春正月己丑湘州刺史建安王休仁加平南將軍辛卯車駕親祠南郊是日又宗祀明堂大赦天下孝子

順孫義夫悌弟賜爵一級慈姑節婦及孤老六疾賜帛五匹穀十斛下四方旌賞茂異其有懷真抱素志行清白恬退自守不交當世或識通古今才經軍國奉公廉直高譽在民具以名奏乙未置五官中郎將左右中郎將官二月乙卯復百官祿三月庚寅立第十三皇子子元爲邵陵王壬寅以倭國王世子興爲安東將軍乙巳改豫州南梁郡爲淮南郡舊淮南郡并宣城丁未輔國將軍征虜長史廣陵太守沈懷文有臯下獄死四月庚申原除南兖州大明三年以前逋租新作大航門五月丙戌置凌室修藏冰之禮壬寅太宰江夏王義恭解領

司徒六月辛酉尚書右僕射護軍將軍劉延孫卒秋七月庚辰以荊州刺史朱修之爲領軍將軍廣州刺史臨海王子頊爲荊州刺史甲申地震戊子以輔國將軍王翼之爲廣州刺史辛卯以西陽太守檀翼之爲交州刺史乙未立第十九皇子子雲爲晉陵王八月癸亥原除雍州大明四年以前逋租乙亥置清臺令九月戊寅制沙門致敬人主戊子以前金紫光祿大夫宗慤爲中護軍乙未尚書右僕射劉遵考爲尚書左僕射丹陽尹王僧朗爲尚書右僕射冬十月丁巳以山陽王休祐子士弘繼鄱陽哀王休業上林苑內民庶丘墓欲還合葬者

勿禁十一月己卯陳留王曹慶秀薨辛巳以尚書令柳元景爲司空尚書令如故

七年春正月癸未詔曰春蒐之禮著自周令講事之語書于魯史所以昭宣德度示民軌則今歲稔氣榮中外寧晏當因農隙葺是舊章可克日於立武湖大閱水師并巡江右講武校獵丁亥以尚書右僕射王僧朗爲太常衛將軍顏師伯爲尚書右僕射己丑以尚書令柳元景爲驃騎大將軍開府儀同三司庚寅以南兖州刺史晉安王子勛爲江州刺史癸巳割吳郡屬南徐州二月甲寅車駕巡南豫南兖二州丙辰詔曰江漢楚望咸秩

周禋禮九疑於盛唐祀蓬萊於渤海皆前載流訓列聖  
遺式霍山是曰南嶽實維國鎮韞靈呈瑞肇光宋道朕  
駐驛于野有事岐陽瞻睇風雲徘徊以想可遣使奠祭  
丁巳車駕校獵于歷陽之烏江己未車駕登烏江縣六  
合山庚申割歷陽秦郡置臨江郡壬寅詔曰朕受天慶  
命十一年於茲矣憑七廟之靈獲上帝之力禮橫四海  
威震八荒方巡三湘而奠衡嶽次九河而檢云岱今恢  
覽功成省風畿表觀民六合蒐校長洲騰沙飛礫平嶽  
盪海鼓晉合序鏡鉦協節獻鬯如禮饁獸傾郊敬舉王  
公之觴廣納士民之壽八風循通卿雲叢聚盡天罄瑞

率宇竭歡思散大極之泉以福無方之外可大赦天下  
行幸所無出今歲租布其逋租餘債勿復收賜民爵一  
級女子百戶牛酒刺守邑宰及民夫從蒐者普加洽賚  
又詔曰朕弱年操製出牧司雍承政宣風荐歷年紀國  
步中阻治戎江甸難夷情義寔繫于懷今或練蒐訓旅  
涉茲境閭故邑耆舊在目罕存年世未遠殲亡太半撫  
迹惟事傾慨兼著太宗燕故晉陽洽恩世祖流仁濟畿  
囑澤永言往猷思廣前賚可蠲歷陽郡租輸三年遣使  
巡慰問民疾苦鰥寡孤老六疾不能自存者厚賜粟帛  
高年加以羊酒凡一介之善隨才銓貫前國名臣及府

州佐吏量所沾錫人身已往施及子孫壬申車駕還宮  
夏四月甲寅以領軍將軍朱修之爲特進丙辰以尚書  
湘東王諱爲領軍將軍甲子詔曰自非臨軍戰陳一不  
得專殺其辜甚重辟者皆如舊先上須報有司嚴加聽  
察犯者以殺人辜論五月乙亥撫軍將軍揚州刺史豫  
章王子尚進號車騎將軍輔國將軍始安王子真爲廣  
州刺史丙子詔曰自今刺史守宰動民興軍皆須手詔  
施行惟邊隅外警及姦釁內發變起倉卒者不從此例  
六月甲辰以北中郎司馬柳元怙爲梁南秦二州刺史  
戊申芮芮國高麗國遣使獻方物戊辰以秦郡太守劉



德願爲豫州刺史七月乙亥征東大將軍高麗王高連  
進號車騎大將軍開府儀同三司秋七月丙申詔曰前  
詔江海田池與民共利歷歲未久浸以弛替名山大川  
往往占固有司嚴加檢糾申明舊制八月丁巳詔曰昔  
匹婦含怨山焦北鄙孀妻哀慟臺傾東國良以誠之所  
動在微必著感之所震雖厚必崩朕臨察九野志深待  
且弗能使爛然成章各如其節遂令炎精損河陽偏不  
施歲云不稔咎寔朕由大官供膳宜從貶撤近道刑獄  
當親料省其王畿內及神州所統可遣尚書與所在共  
訊畿外諸州委之刺史并訊省律令思存利民其考謚

賀襲在大明七年以前一切勿治尤弊之家開倉賑給  
乙丑立第十六皇子子孟爲淮南王第十八皇子子產  
爲臨賀王車駕幸建康秣陵縣訊獄囚九月乙卯詔曰  
近炎精亢序苗稼多傷今二麥未晚甘澤頻降可下東  
境郡勤課墾殖尤弊之家量貸麥種戊子詔曰昔周王  
驥迹寔窮四溟漢帝鸞軫夙徧五嶽是皆所以上對幽  
靈下理民土自天昌替馭臨宮創圖禮代天鬱世貿興  
毀皇家造宋日月重光璇璣得序五星順命而戎車歲  
動陳詩義闕朕聿含五光奄一天下思盡寶戒之規以  
塞謀危之路當公時省方觀察風俗外詳考舊典以副

側席之懷庚寅南徐州刺史新安王子鸞兼司徒乙未  
車駕幸廷尉訊獄囚丙申立第十七皇子子嗣爲東平  
王冬十月壬寅太子冠賜王公以下帛各有差戊申車  
駕巡南豫州詔曰朕巡幸所經先見百年者及孤寡老  
疾並賜粟帛獄繫刑罪並親聽訟其士庶或怨鬱危滯  
受抑吏司或隱約潔立負擯州里皆聽進朕前面自陳  
訴若忠信孝義力田殖穀一介之能一藝之美悉加旌  
賞雖秋澤頻降而夏旱嬰弊可卽開行倉並加賑賜癸  
丑行幸江寧縣訊獄囚車騎將軍揚州刺史豫章王子  
尚加開府儀同三司癸亥衛將軍開府儀同三司東海

王禕爲司空中軍將軍義陽王昶加開府儀同三司丙寅詔曰賞慶刑威奄國彝軌黜幽升明闢寓恒憲故採言聆風式觀侈質貶爵加地於是乎在今類帝宜社親巡江甸因覲嶽守躬求民瘼思弘明試之典以申考績之義行幸所經莅民之職功宣於德卽加甄賞若廢務亂民隨讐議罰主者詳察以聞己巳車駕校獵於姑熟十一月丙子曲赦南豫州殊死以下巡幸所經詳減今歲田租乙酉詔遣祭晉大司馬桓溫征西將軍毛璩墓上於行所訊溧陽永世丹陽縣囚癸巳車駕習水軍於梁山有白爵二集華蓋有司奏改大明七年爲神爵元

年詔不許乙未原放行獄徒繫東諸郡大獄壬寅遣使  
開倉貸卹聽受雜物當租十二月丙午行幸歷陽甲寅  
大赦天下南豫州別署敕繫長徒一切原散其兵期考  
襲謫戍悉停歷陽郡女子百戶牛酒高年孤疾賜帛十  
匹蠲郡租十年己未太宰江夏王義恭加尚書令於博  
望梁山立雙闕癸亥車駕至自歷陽

八年春正月甲戌詔曰東境去歲不稔宜廣商貨遠近  
販鬻米者可停道中雜稅其以仗自防悉勿禁癸未安  
北將軍雍州刺史劉秀之卒戊子以平南將軍湘州刺  
史建安王休仁爲安南將軍江州刺史晉安王子勛爲

鎮軍將軍雍州刺史徐州刺史新安王子鸞爲撫軍將軍領司徒刺史如故輔國將軍江夏王世子伯禽爲湘州刺史二月辛丑特進朱修之卒壬寅詔曰去歲東境偏旱田畝失收使命來者多至乏絕或下窮流穴頓伏街巷朕甚閔之可出倉米付建康秣陵二縣隨宜贍恤若溫拯不時以至捐棄者嚴加糾劾乙巳以鎮軍將軍湘東王諱爲鎮北將軍徐州刺史平北將軍徐州刺史王玄謨爲領軍將軍夏閏五月辛丑以前御史中丞蕭惠開爲青冀二州刺史壬寅太宰江夏王義恭領太尉特進右光祿大夫羊玄保卒庚申帝崩於玉燭殿時年

宋書卷六  
三十五秋七月丙午葬丹陽秣陵縣巖山景寧陵

史臣曰役已以利天下堯舜之心也利已以及萬物中  
主之志也盡民命以自養桀紂之行也觀大明之世其  
將盡民命乎雖有周公之才之美猶終之以亂何益哉

宋書卷六

宋書卷六考證

孝武帝紀以寧朔將軍劉季之爲司州刺史○季監本  
誤秀臣承蒼按秀之遷寧朔將軍益州刺史在孝建  
之初大明二年以寧朔將軍爲司州刺史次年反叛  
被誅特以字形相近遂致訛舛今改正

雍州刺史海陵王休茂殺司馬庾深之舉兵反義成太  
守薛繼考討斬之○臣承蒼按休茂傳薛繼考乃爲

休茂盡力之人此於帝紀忽以討休茂之功歸之何  
一書之中互相悖謬至此南史載參軍尹元慶起義  
討之傳首建鄴殆是其實



宋書卷六考證

宋書卷七

梁

沈

約

撰

本紀第七

前廢帝

前廢帝諱子業小字法師孝武帝長子也元嘉二十六年正月甲申生世祖鎮尋陽子業留京邑三十年世祖入伐元凶被囚侍中下省將見害者數矣卒得無恙世祖踐祚立爲皇太子始末之東宮中庶子二率並入直永福省大明二年出東宮四年講孝經於崇正殿七年加元服八年閏五月庚申世祖崩其日太子卽皇帝位

大赦天下太宰江夏王義恭解尚書令加中書監驃騎  
大將軍柳元景加尚書令甲子置錄尚書太宰江夏王  
義恭錄尚書事驃騎大將軍柳元景加開府儀同三司  
丹陽尹永嘉王子仁爲南豫州刺史六月辛未詔曰朕  
以眇身夙紹洪業敬御天威欽對靈命仰尊凝緒日鑒  
前圖寔可以拱默守成詒風長世而寶位告始萬寓改  
屬惟德弗明昧于大道思宣睿範引茲簡恤可具詢執  
事詳訪民隱凡曲令密文繁而作治關市儻稅事施一  
時而姦吏舞文妄興威福加以氣緯舛立偏頗滋甚宜  
其寬徭輕憲以救民切御府諸署事不須廣雕文篆刻

無施於今悉宜并省以酬氓願藩王貿貨壹皆禁斷外  
便具條以聞戊寅以豫州之淮南郡復爲南梁郡復分  
宣城還置淮南郡庚辰以南海太守袁曇遠爲廣州刺  
史秋七月己亥鎮軍將軍雍州刺史晉安王子勛改爲  
江州刺史中護軍宗慤爲安西將軍雍州刺史鎮北將  
軍徐州刺史湘東王諱爲護軍將軍中軍將軍義陽王  
和爲征北將軍徐州刺史庚戌婆皇國遣使獻方物崇  
皇太后曰太皇太后皇后曰皇太后乙卯罷南北二馳  
道孝建以來所改制度還依元嘉丙辰追崇獻妃爲獻  
皇后乙丑撫軍將軍南徐州刺史新安王子鸞解領司

徒八月丁卯領軍將軍王玄謨爲鎮北將軍南徐州刺史新安王子鸞爲青冀二州刺史己巳以青冀二州刺史蕭惠開爲益州刺史己未皇太后崩京師雨水庚子遣御史與官長隨宜賑卹九月辛丑護軍將軍湘東王諱爲領軍將軍癸卯以尚書左僕射劉遵考爲特進右光祿大夫乙卯文穆皇后祔葬景寧陵冬十月甲戌太常建安王休仁爲護軍將軍戊寅輔國將軍宋越爲司州刺史庚辰原除揚南徐州大明七年逋租十二月乙酉以尚書右僕射顏師伯爲尚書左僕射壬辰以王畿諸郡爲揚州以揚州爲東揚州癸巳以車騎將軍揚州

刺史豫章王子尚爲司徒揚州刺史去歲及是歲東諸郡大旱甚者米一升數百京邑亦至百餘餓死者十有六七孝建以來又立錢署鑄錢百姓因此盜鑄錢轉僞小商貨不行

永光元年春正月乙未朔改元大赦天下乙巳省諸州臺傳戊午以領軍將軍湘東王諱爲衛將軍南豫州刺史護軍將軍建安王休仁爲領軍將軍秘書監山陽王休祐爲豫州刺史左衛將軍桂陽王休範爲中護軍南豫州刺史尋陽王子房爲東揚州刺史二月丁丑減州郡縣田租之半庚寅鑄二銖錢三月甲辰罷臨江郡五

月己亥割郢州隨郡屬雍州丙午以後軍司馬張牧爲  
交州刺史八月己巳左軍長史劉道隆爲梁南秦二州  
刺史乙亥安西將軍雍州刺史宗慤卒壬午衛將軍豫  
州刺史湘東王諱改爲雍州刺史尚書令驃騎大將軍  
柳元景加南豫州刺史秋八月辛酉越騎校尉戴法興  
有罪賜死庚午以尚書左僕射顏師伯爲尚書僕射吏  
部尚書王景文爲尚書右僕射癸酉帝自率宿衛兵誅  
太宰江夏王義恭尚書令驃騎大將軍柳元景尚書僕  
射顏師伯廷尉劉德願改元爲景和元年文武賜位二  
等以領軍將軍建安王休仁爲安西將軍雍州刺史衛

將軍湘東王諱還爲南豫州刺史甲戌司徒揚州刺史  
豫章王子尚領尚書令射聲校尉沈文秀爲青州刺史  
左軍司馬崔道固爲冀州刺史乙亥詔曰昔凝神佇逸  
礪溪讚道湛慮思才傅巖毗化朕位御三極風澄萬寓  
資鈇電斷正卯斯戮思所以仰宣遺烈俯弘景祚每結  
夢庖鼎瞻言板築有劬日昃無忘昧且可甄訪郡國招  
聘閭部其有孝性忠節幽居遜棲信誠義行廉正表俗  
文敏博識幹事治民務加旌舉隨才引擢庶官克順彝  
倫咸叙主者精加詳括稱朕意焉以始興公沈慶之爲  
太尉鎮北將軍青冀二州刺史王玄謨爲領軍將軍庚



辰以石頭城爲長樂宮東府城爲未央宮罷東揚州并揚州甲申以北邸爲建章宮南第爲長楊宮以冠軍將軍邵陵王子元爲湘州刺史丙戌原除吳興義興晉陵琅邪五郡大明八年以前逋租己丑復立南北二馳道九月癸巳車駕幸湖熟奏鼓吹戊戌車駕還宮庚子以南兖州刺史永嘉王子仁爲南徐州刺史丹陽尹始安王子真爲南兖州刺史辛丑撫軍將軍南徐州刺史新安王子鸞免爲庶人賜死丙午以兖州刺史薛安都爲平北將軍徐州刺史丁未衛將軍湘東王諱加開府儀同三司特進右光祿大夫劉遵考爲安西將軍南豫

州刺史寧朔將軍殷孝祖爲兗州刺史戊申以前梁南  
秦二州刺史柳元怙復爲梁南秦二州刺史己酉車駕  
討征北將軍徐州刺史義陽王昶內外戒嚴昶奔于索  
虜辛亥右將軍豫州刺史山陽王休祐進號鎮西大將  
軍甲寅以安西長史袁顥爲雍州刺史戊午以左民尚  
書劉思考爲益州刺史是日解嚴車駕幸瓜步開百姓  
鑄錢冬十月癸亥曲赦徐州丙寅車駕還宮以建安王  
休仁爲護軍將軍己卯東陽太守王藻下獄死以宮人  
謝貴嬪爲夫人加虎賁戟鸞輅龍旂出警入蹕實新  
蔡公主也乙酉以鎮北大將軍豫州刺史山陽王休祐

爲鎮軍大將軍開府儀同三司十一月壬辰寧朔將軍  
何邁下獄死新除太尉沈慶之薨壬寅立皇后路氏四  
廂奏樂赦揚南徐二州護軍將軍建安王休仁加特進  
左光祿大夫中護軍桂陽王休範遷職丁未皇子生少  
府劉勝之子也大赦天下賊汙淫盜悉皆原除賜爲父  
後者爵一級壬子以特進左光祿大夫護軍將軍建安  
王休仁爲驃騎大將軍開府儀同三司戊午南平王敬  
猷廬陵王敬先安南侯敬淵並賜死時帝凶悖日甚誅  
殺相繼內外百司不保首領先是訛言云湘中出天子  
帝將南巡荆湘二州以厭之先欲誅諸叔然後發引太

宗與左右阮佃夫王道隆李道兒密結帝左右壽寂之  
姜產之等十一人謀共廢帝戊午夜帝於華林園竹林  
堂射鬼時巫覡云此堂有鬼故帝自射之壽寂之懷刀  
直入姜產之爲副帝欲走寂之追而殞之時年十七太  
皇太后令曰司徒領護軍八座子業雖曰嫡長少稟凶  
毒不仁不孝著自髻亂孝武棄世屬當辰歷自梓宮在  
殞喜容覩然天罰重離歡恣滋甚逼以內外維持忍虐  
未露而凶慘難抑一旦肆禍遂縱戮上宰殄害輔臣子  
鸞兄弟先帝鍾愛含怨旣往枉加屠酷昶茂親作扞橫  
相徵討新蔡公主逼離夫族幽置深宮詭云薨殞襄事

甫爾喪禮頓釋昏酣長夜庶事傾遺朝賢舊勲棄若遺  
土管絃不輟珍羞備膳詈辱祖考以爲戲謔行游莫止  
淫縱無度肆宴園林規圖發掘誅剪無辜籍略婦女建  
樹僞豎莫知誰息拜嬪立后慶過恒典宗室密戚遇若  
婢僕鞭捶陵曳無復尊卑南平一門特鍾其酷反天滅  
理顯暴萬端苛罰酷令終無紀極夏桀殷辛未足以譬  
闔朝業業人不自保百姓遑遑手足靡厝行穢禽獸罪  
盈三千高祖之業將泯七廟之享幾絕吾老疾沈篤每  
規禍鴆憂煎漏刻氣命無幾開闢以降所未嘗聞遠近  
思奮十室而九衛將軍湘東王體自太祖天縱英聖文

皇鍾愛寵冠列藩吾早識神睿特兼常禮潛運宏規義  
士投袂獨夫旣殞懸首白旗社稷再興宗祏永固人鬼  
屬心大命允集且勲德高邈大業攸歸宜遵漢晉纂承  
皇極主者詳舊典以時奉行未亡人餘年不幸嬰此百  
艱永尋情事雖存若殞當復柰何當復柰何葬廢帝丹  
陽秣陵縣南郊壇西帝幼而狷急在東宮每爲世祖所  
責世祖西巡子業啓參承起居書迹不謹上詰讓之子  
業啓事陳謝上又答曰書不長進此是一條耳聞汝素  
都懈怠狷戾日甚何以頑固乃爾邪初踐阼受璽紱悖  
然無哀容始猶難諸大臣及戴法興等旣殺法興諸大

臣莫不震懾於是又誅羣公元凱以下皆被毆捶牽曳  
內外危懼殿省騷然初太后疾篤遣呼帝帝曰病人間  
多鬼可畏那可往太后怒語侍者將刀來破我腹那得  
生如此寧馨兒及太后崩後數日帝夢太后謂之曰汝  
不孝不仁本無人君之相子尚愚悖如此亦非運胙所  
及孝武險虐滅道怨結人神兒子雖多並無天命大運  
所歸應還文帝之子其後湘東王紹位果文帝子也故  
帝聚諸叔京邑慮在外爲患山陰公主淫恣過度謂帝  
曰妾與陛下雖男女有殊俱託體先帝陛下六宮萬數  
而妾唯駙馬一人事不均平一何至此帝乃爲主置面

首左右三十人進爵會稽郡長公主秩同郡王侯湯沐  
邑二千戶給鼓吹一部加班劔二十人帝每出與朝臣  
常共陪輦主以吏部郎褚淵兒美就帝請以自侍帝許  
之淵侍主十日備見逼迫誓死不回遂得免帝所幸閹  
人華願兒官至散騎常侍加將軍帶郡帝少好講書頗  
識古事自造世祖誅及雜篇章往往有辭采以魏武帝  
有發丘中郎將摸金校尉乃置此二官以建安王休祐  
領之其餘事迹分見諸列傳

史臣曰廢帝之事行著于篇若夫武王數殷紂之豐不  
能絙其萬一霍光書昌邑之過未足舉其毫釐假以中



才之君有一于此足以實社殘宗汚宮瀆廟况總斯惡  
以萃一人之體乎其得亡亦爲幸矣

宋書卷七

宋書卷七考證

前廢帝紀二月丁丑減州郡縣田租之半○租監本訛  
祿今改正

以尚書左僕射顏師伯爲尚書僕射○一本上尚書下  
無左字下尚書下有左字

臣承蒼

按二本俱誤據師

伯傳當云以尚書右僕射顏師伯爲尚書左僕射下  
文云王景文爲尚書右僕射替師伯之任也

丁未皇子生少府劉勝之子也○劉勝南史作劉矇符  
瑞志大明七年有尋陽太守劉矇或卽其人

其後湘東王紹位果文帝子也故帝聚諸叔京邑慮在

外爲患○臣承蒼按上二句當在故帝聚諸叔二句

下

宋書卷七考證

宋書卷八

梁

沈

約

撰

本紀第八

明帝

太宗明皇帝諱彧字休炳小字榮期文帝第十一子也  
元嘉十六年十月戊寅生二十五年封淮陽王食邑二  
千戶二十九年改封湘東王元凶弒立以爲驍騎將軍  
加給事中世祖踐阼爲秘書監遷冠軍將軍南蘭陵下  
邳二郡太守領石頭戍事孝建元年徙爲南彭城東海  
二郡太守將軍如故鎮京口其年徵爲中護軍二年遷

侍中領遊擊將軍三年徙衛尉侍中如故又爲左衛將軍衛尉如故大明元年轉中護軍衛尉如故三年爲都官尚書領遊擊將軍衛尉如故七年遷領軍將軍八年出爲使持節都督徐兗二州豫州之梁郡諸軍事鎮北將軍徐州刺史給鼓吹一部其年徵爲侍中護軍將軍未拜復爲領軍將軍侍中如故永光元年又出爲使持節散騎常侍都督南豫豫司江四州揚州之宣城諸軍事衛將軍南豫州刺史鎮姑熟又徙爲都督雍梁南北秦四州郢州之竟陵諸軍事寧蠻校尉雍州刺史持節常侍將軍如故未拜復本位尋以本號開府儀同三司

廢帝景和末上入朝被留停都廢帝誅害宰輔殺戮大臣恒慮有圖之者疑畏諸父並拘之殿內遇上無禮事在文諸王傳遂收上付廷尉一宿被原將加禍害者前後非一旣而害上意定明日便應就禍上先已與腹心阮佃夫李道兒等密共合謀于時廢帝左右常慮禍及人人有異志唯有直閣將軍宋越譚金童太一等數人爲其腹心並號虎有幹力在殿省久衆並畏服之故莫敢動是夕越等並外宿佃夫道兒因結壽寂之等殞廢帝於後堂十一月二十九日夜也事定上未知所爲建安王休仁便稱臣奉引升西堂登御坐召見諸大臣于

時事起倉卒上失履跣至西堂猶著烏帽坐定休仁呼  
主衣以白帽代之令備羽儀雖未卽位凡衆事悉稱令  
書施行己未司徒揚州刺史豫章王子尚山陰公主並  
賜死宋越譚金童太一謀反伏誅十二月庚申朔令書  
以司空東海王禕爲中書監太尉鎮軍將軍江州刺史  
晉安王子勛進號車騎將軍開府儀同三司癸亥以新  
除驃騎大將軍建安王休仁爲司徒尚書令揚州刺史  
鎮軍將軍開府儀同三司山陽王休祐進號驃騎大將  
軍荊州刺史崇憲衛尉桂陽王休範爲鎮北將軍南徐  
州刺史乙丑改封安陸王子綏爲江夏王

秦始皇元年冬十二月丙寅上卽皇帝位詔曰高祖武皇帝德洞四瀛化綿九服太祖文皇帝以大明定基世祖孝武皇帝以下武寧亂日月所照梯山航海風雨所均削衽襲帶所以業固盛漢聲溢隆周子業凶嚚白天忍悖成性人面獸心見於韶日反道敗德著自比年其狎侮五常怠棄三正矯誣上天毒流下國寔開闢所未有書契所未聞再罹邊密而無一日之哀齊斬在躬方深北里之樂虎兕難匣憑河必彰遂誅滅上宰窮豐逆之酷虐害國輔究孥戮之刑子鸞同生以昔憾殄殪敬猷兄弟以睚眦殲夷徵逼義陽將加屠膾陵辱戚藩檟楚



妃主奪立左右竊子置儲肆酗于朝宣淫于國事穢東  
陵行汙飛走積豐罔極日月滋深比遂圖犯玄宮志窺  
題湊將肆梟獍之禍騁商頓之心又欲鳩毒崇憲虐加  
諸父事均宮闈聲遍國都鴟梟小豎莫不寵暱朝廷忠  
誠必加戮挫收掩之旨虓虎結轍掠奪之使白刃相望  
百僚危氣首領無有全地萬姓崩心妻子不復相保所  
以鬼哭山鳴星鉤血降神器殆於馭索景祚危於綴旒  
朕假寐凝憂泣血待旦慮大宋之基於焉而泯武文之  
業將墜于淵賴七廟之靈藉八百之慶巨猾斯殄鴻沚  
時褻皇綱絕而復紐天緯缺而更張猥以寡薄屬承乾

統上緝三光之重俯顧庶民之艱業業矜矜若履冰谷  
思與億兆同此維新可大赦天下改景和元年爲泰始  
元年賜民爵二級鰥寡孤獨不能自存者穀人五斛逋  
租宿債勿復收犯鄉論清議贓汙淫盜並悉洗除長徒  
之身特賜原遣亡官失爵禁錮舊勞一依舊典其昏制  
謬封並皆刊削己巳以安西將軍南豫州刺史劉遵考  
爲特進右光祿大夫輔國將軍歷陽南譙二郡太守建  
平王景素爲南豫州刺史庚午以荊州刺史臨海王子  
頊爲鎮軍將軍徐州刺史永嘉王子仁爲中軍將軍左  
衛將軍劉道隆爲中護軍辛未改封臨賀王子產爲南

平王晉熙王子輿爲廬陵王壬申以尚書左僕射王景文爲尚書僕射新除中護軍劉道隆卒壬午詔曰朕戡亂寧民屬膺景祚鴻制初造革道惟新而國故頻罹仁澤偏壅每鑒寐疚心罔識攸濟巡方問俗弘政所先可分遣大使廣求民瘼考守宰之良採衡閭之善若獄狂淹枉傷民害教者具以事聞鰥寡孤獨癯殘六疾不能自存者郡縣優量賑給貞婦孝子高行力田許悉條奏務詢輿誦廣納嘉謀每盡皇華之旨俾若朕親覽焉乙亥追尊所生沈婕妤曰宣皇太后後軍將軍垣閎爲司州刺史前右將軍長史殷琰爲豫州刺史丙子詔曰皇

室多故糜費滋廣且久歲不登公私歎弊方刻意從儉  
弘濟時艱政道未孚愧兼積大官供膳可詳所減撤  
尚方御府雕文篆刻無益之物一皆蠲省務存簡約以  
稱朕心戊寅崇太后爲崇憲皇太后立皇后王氏鎮軍  
將軍江州刺史晉安王子勛舉兵反鎮軍長史鄧琬爲  
其謀主雍州刺史袁顓率衆赴之辛巳驃騎大將軍前  
荊州刺史山陽王休祐改爲江州刺史荊州刺史臨海  
王子頊卽留本任加領軍將軍王立謨鎮軍將軍壬午  
車駕謁太廟甲申後將軍郢州刺史安陸王子綏進號  
征南將軍右將軍會稽太守尋陽王子房進號安東將

軍前將軍荊州刺史臨海王子頊進號平西將軍子綏  
子房子頊並不受命舉兵同逆戊子新除中軍將軍永  
嘉王子仁爲護軍將軍

二年春正月己丑朔以軍事不朝會庚寅以金紫光祿  
大夫王僧朗爲左光祿大夫開府儀同三司壬辰驃騎  
大將軍江州刺史山陽王休祐改爲南豫州刺史鎮歷  
陽鎮軍將軍領軍將軍王玄謨爲車騎將軍江州刺史  
平北將軍徐州刺史薛安都進號安北將軍安都亦不  
受命癸巳以左衛將軍巴陵王休若爲鎮東將軍新除  
安東將軍尋陽王子房爲撫軍將軍司徒左長史袁愨

孫爲領軍將軍甲午中外戒嚴司徒建安王休仁都督  
征討諸軍事統衆軍南討以青州刺史劉祇爲南兗州  
刺史丙申以征虜司馬申令孫爲徐州刺史義陽內史  
龐孟蚪爲司州刺史申令孫孟蚪及豫州刺史殷琰青  
州刺史沈文秀冀州刺史崔道固湘州行事何慧文廣  
州刺史袁曇遠益州刺史蕭惠開梁州刺史柳元怙並  
同叛逆兗州刺史殷孝祖入衛京都仍遣孝祖前鋒南  
伐甲辰加孝祖撫軍將軍丙午車駕親御六師出頓中  
興堂辛亥驃騎大將軍南豫州刺史山陽王休祐改爲  
豫州刺史統衆軍西討吳郡太守顧琛吳興太守王曇

生義興太守劉延熙晉陵太守袁標山陽太守程天祚  
並舉兵反鎮東將軍巴陵王休若統衆軍東討壬子崇  
憲皇太后崩是日軍主任農夫劉懷珍平定義興永世  
縣民史逸宗據縣爲逆殿中將軍陸攸之討平之丙辰  
以新除左光祿大夫開府儀同三司王僧朗爲特進左  
光祿大夫如故二月乙丑僧朗卒尚書僕射王景文父  
憂去職曲赦吳興義興晉陵四郡吏部尚書蔡興宗  
爲尚書左僕射吳興太守張永右軍將軍齊王東討平  
晉陵癸未曲赦浙江東五郡丁亥鎮東將軍巴陵王休  
若進號衛將軍建武將軍吳嘉公率諸軍破賊於吳興

興會稽平定三郡同逆皆伏誅輔國將軍齊王前鋒北  
討輔國將軍劉劬前鋒南討賊劉胡領衆四萬據赭圻  
三月庚寅撫軍將軍沈攸之代爲南討前鋒賊衆稍盛  
袁顛頓鵠尾聯營迄至濃湖衆十餘萬壬辰以新除太  
子詹事張永爲青冀二州刺史丙申鎮北將軍南徐州  
刺史桂陽王休範總統北討諸軍事丁酉以尚書劉思  
考爲徐州刺史戊戌貶尋陽王子房爵爲松滋縣侯乙  
巳以奉朝請鄭黑爲司州刺史辛亥鎮北將軍南徐州  
刺史桂陽王休範領南兖州刺史壬子斷新錢專用古  
錢癸丑原赦揚南徐二州囚繫凡逋亡一無所問夏四



月壬午以散騎侍郎明僧暲爲青州刺史五月壬辰以  
輔國將軍沈攸之爲雍州刺史丁酉曲赦豫州丁未新  
除尚書僕射王景文爲中軍將軍以青冀二州刺史張  
永爲鎮軍將軍庚戌以寧朔將軍劉乘民爲冀州刺史  
甲寅葬崇憲皇太后於攸寧陵冠軍將軍益州刺史蕭  
惠開進號平西將軍六月辛酉鎮軍將軍張永領徐州  
刺史京師雨水丁卯遣殿中將軍檢行賜卹以左軍將  
軍垣恭祖爲梁南秦二州刺史秋七月己丑鎮北將軍  
南徐兖二州刺史桂陽王休範進號征北大將軍辛卯  
鎮軍將軍徐州刺史張永改爲南兖州刺史丁酉以仇

池太守楊僧副爲北秦州刺史武都王壬寅以男子時  
朗之爲北豫州刺史乙巳龍驤將軍劉道符平山陽辛  
亥又以義軍主鄭叔舉爲北豫州刺史鎮軍將軍南兗  
州刺史張永復領徐州刺史甲寅復以冀州刺史崔道  
固爲徐州刺史八月己卯司徒建安王休仁率衆軍大  
破賊斬僞尚書僕射袁顓進討江郢荆雍湘五州平定  
之晉安王子勛安陸王子綏臨海王子頊邵陵王子元  
並賜死同黨皆伏誅諸將軍帥封賞各有差甲申以護  
軍將軍永嘉王子仁爲平南將軍湘州刺史九月乙酉  
曲赦江郢荆雍湘五州守宰不得離職壬辰驃騎大將

軍豫州刺史山陽王休祐改爲荊州刺史分豫州立南  
豫州癸巳六軍解嚴大赦天下賜民爵一級甲午以中  
軍將軍王景文爲安南將軍江州刺史戊戌以車騎將  
軍江州刺史王玄謨爲左光祿大夫開府儀同三司護  
軍將軍庚子以建安王休仁世子伯融爲豫州刺史辛  
丑衛將軍巴陵王休若卽本號爲雍州刺史雍州刺史  
沈攸之爲郢州刺史庚戌以太子左衛率建平王景素  
爲南兖州刺史十月乙卯永嘉王子仁始安王子真淮  
南王子孟南平王子產廬陵王子輿松滋侯子房並賜  
死丁卯以郢州刺史沈攸之爲中領軍與張永俱北討

庚午以吳郡太守顧顛之爲湘州刺史戊寅立皇子昱爲皇太子曲赦揚徐二州以輔國將軍劉劭爲廣州刺史左軍將軍張世爲豫州刺史十一月甲申以安成太守劉襲爲郢州刺史壬辰詔曰治崇簡易化疾繁侈遠關隆替明著軌跡者也朕拯斯墜運屬此屯極仍之以凋耗因之以師旅而識昧前王務艱昔代俾夫舊賦旣繁爲費彌廣鑿寐萬務每思弘革方欲緩繇優調愛民爲先有司詳加寬惠更立科品其方物職貢各順土宜出獻納貢敬依時令凡諸蠹俗妨民之事趣末違本之業雕華靡麗奇器異技並嚴加裁斷務歸要實左右尚

方御府諸署供御制造咸存儉約庶淳風至教微遵太古阜財興讓少敦季俗又詔曰矢機詢政立教之攸本舉賢聘逸弘化之所基故負鼎進策殷代以康釋釣作輔周祚斯又朕甫承大業訓道未敷雖側席忠規竚夢巖築而良圖莫薦奇士弗聞永鑒通古無忘宵寐今藩隅克晏敷化維始屢懷存治實望箴闕王公卿尹羣僚庶官其有嘉謀直獻匡俗濟時咸切事陳奏無或依隱若乃林澤貞栖丘園耿潔博洽古今敦崇孝讓四方在任可明書搜揚具卽以聞隨就褒立以建平王景素子延年爲新安王以新除左光祿大夫開府儀同三司王

玄謨爲車騎將軍南豫州刺史丙申制使東土經荒流  
散並各還本蠲衆調二年十二月己未以尚書金部郎  
劉善明爲冀州刺史乙丑詔曰近衆藩稱亂多染豐科  
或誠係本朝事緣逼迫混同證錮良以悵然夫天道尚  
仁德刑並用雷霆時至雲雨必解朕眷言靜念思弘風  
澤凡應禁削皆從原蕩其文武堪能隨才銓用辛未以  
新除廣州刺史劉勔爲益州刺史前巴西梓潼二郡太  
守費混爲廣州刺史劉勔克壽陽豫州平辛巳以輔國  
將軍劉靈道爲梁南秦二州刺史薛安都要引索虜張  
永沈攸之大敗於是遂失淮北四州及豫州淮西地

三年春正月庚子以農役將興太官停宰牛癸卯曲赦  
豫南豫二州衛將軍巴陵王休若降號鎮西將軍閏月  
庚午京師大雨雪遣使巡行賑賜各有差戊寅以游擊  
將軍垣閔爲益州刺史二月甲申以御史中丞羊南爲  
廣州刺史是日車駕爲戰亡將士舉哀己丑以鎮西司  
馬劉亮爲梁南秦二州刺史索虜寇汝陰太守張景遠  
擊破之丙申曲赦青冀二州三月丙子以尚書左僕射  
蔡興宗爲安西將軍郢州刺史戊寅以冠軍將軍王玄  
載爲徐州刺史寧朔將軍崔平爲兗州刺史夏四月癸  
巳以前司州刺史鄭黑爲司州刺史乙未冠軍將軍北

秦州刺史楊僧嗣進號征西將軍庚子立桂陽王休範  
第二子德副爲廬陵王立侍中劉韞第二子銑爲南豐  
王丙午安西將軍蔡興宗降號平西將軍五月丙辰宣  
太后崇寧陵禁內墳屋瘞遷徙者給葬直蠲復家丁戊  
午以車騎將軍南豫州刺史王玄謨爲左光祿大夫開  
府儀同三司辛酉罷南豫州并豫州壬戌以太子詹事  
袁粲爲尚書僕射六月乙酉以侍中劉韞爲湘州刺史  
秋七月壬子以左光祿大夫開府儀同三司王玄謨爲  
特進左光祿大夫護軍將軍薛安都子伯令略據雍州  
四郡刺史巴陵王休若討斬之八月丁酉詔曰古者衡



虞置制蠶蛾不收川澤產育登器進御所以繁阜民財  
養遂生德頃商販逐末競早爭新折未實之果收豪家  
之利籠非膳之翼爲戲童之資豈所以還風尚本捐華  
務實宜修道布仁以革斯蠹自今鱗介羽毛肴核衆品  
非時月可採器味所須可一皆禁斷嚴爲科制壬寅以  
中領軍沈攸之行南兖州刺史率衆北討癸卯詔曰法  
網之用期世而行寬惠之道因時而布況朕尚德戡亂  
依仁馭俗宜每就弘簡以隆至治而頻罹兵革繇賦未  
休軍民巧僞興事甚多蹈刑入憲諒非一科至乃假名  
戎伍竊爵私庭因戰散亡託懼逃役且往諸淪逼雖經

累宥逋竄之黨猶爲實繁宵言永懷良兼矜疾思所以  
重播至澤覃被區宇可大赦天下加新除左光祿大夫  
王玄謨車騎將軍丙午遣吏部尚書褚淵慰勞緣淮將  
帥隨宜量賜戊申以新除右衛將軍劉劭爲豫州刺史  
九月癸丑鎮西將軍雍州刺史巴陵王休若進號衛將  
軍平西將軍郢州刺史蔡興宗進號安西將軍乙卯以  
越騎校尉周寧民爲兗州刺史戊午以皇后六宮以下  
雜衣千領金釵千枚班賜北征將士庚申前將軍兼冀  
州刺史崔道固進號平北將軍甲子曲赦徐兗青冀四  
州冬十月壬午改封新安王延年爲始平王戊子芮芮

國遣使獻方物辛丑復郡縣公田鎮西大將軍西秦河  
二州刺史吐谷渾拾寅進號征西大將軍十一月立建  
安王休仁第二子伯猷爲江夏王改封義陽王昶爲晉  
熙王乙卯分徐州置東徐州以輔國將軍張儼爲刺史  
高麗國百濟國遣使獻方物十二月庚辰以寧朔將軍  
劉休賓爲兗州刺史

四年春正月己未車駕親祠南郊大赦天下庚午衛將  
軍巴陵王休若降號左將軍乙亥零陵王司馬勗薨二  
月辛丑以前龍驤將軍常珍奇爲平北將軍司州刺史  
珍奇子超越爲北冀州刺史乙巳右光祿大夫車騎將

軍護軍將軍王玄謨薨三月己未以游擊將軍劉懷珍  
爲東徐州刺史戊辰以軍司馬劉靈遺爲梁南秦二州  
刺史譙南太守孫奉伯爲交州刺史交州人李長仁據  
州叛妖賊攻廣州殺刺史羊南龍驤將軍陳伯紹討平  
之夏四月己卯復減郡縣田租之半東海王禕改封廬  
江王山陽王休祐改封晉平王改晉安郡爲晉平郡辛  
丑芮芮國及河南王並遣使獻方物甲辰以豫章太守  
張辯爲廣州刺史五月乙未曲赦廣州癸亥以行雒州  
刺史巴陵王休若行湘州刺史會稽太守張永爲雒州  
刺史湘州刺史劉韞爲南兖州刺史秋七月乙巳朔以

吳郡太守王琨爲中領軍丙辰始平王延年薨己未以  
侍中劉襲爲中護軍庚申以驍騎將軍齊王爲南兗州  
刺史八月戊子以南康相劉勃爲交州刺史辛卯分青  
州置東青州以輔國將軍沈文靖爲東青州刺史丁酉  
安南將軍江州刺史王景文進號鎮南將軍九月丙辰  
以驃騎長史張悅爲雒州刺史戊辰詔曰夫愆有小大  
憲隨寬猛故五刑殊用三典異施而降辟次網便暨鉗  
撻求之法科差品滋遠朕務存欽卹每有矜貸尋剗制  
科罪輕重同之大辟卽事原情未爲詳衷自今凡竊執  
官仗拒戰邏司或攻剽亭寺及害吏民者凡此諸條悉

依舊制五人以下相逼奪者可特賜黥則投畀四遠仍  
用代殺方古爲優全命長戶施同造物庶簡惠之化有  
孚羣萌好生之德無漏幽品庚午曲赦揚南徐兗豫四  
州冬十月癸酉朔日有蝕之發諸州兵北討南康建安  
安成宣城四郡昔不同南逆並不在徵發之例甲戌割  
揚州之義興郡屬南徐州

五年春正月癸亥車駕躬耕籍田大赦天下賜力田爵  
一級二月丙申分豫州揚州立南豫州以太尉廬江王  
禧爲車騎將軍開府儀同三司南豫州刺史三月乙卯  
於南豫州立南義陽郡丙寅車駕幸中堂聽訟己巳河

南王遣使獻方物夏四月辛未割離州隨郡屬郢州乙酉割豫州義陽郡屬郢州郢州西陽郡屬豫州戊子以寧朔將軍崔公烈爲兗州刺史戊戌新除給事黃門侍郎杜幼文爲梁南秦二州刺史六月辛未晉平王休祐子宣曜爲南平王壬申以安西將軍郢州刺史蔡興宗爲鎮東將軍癸酉以左衛將軍沈攸之爲郢州刺史以軍興已來百官斷俸並給生食丁丑車騎將軍南豫州刺史廬江王禕免官爵戊寅以左將軍行湘州刺史巴陵王休若爲征南將軍湘州刺史壬午罷南豫州丙戌以新除給事黃門侍郎劉亮爲益州刺史秋七月己酉

以輔國將軍王亮爲徐州刺史東莞太守陳伯紹爲交  
州刺史甲寅以山陽太守李靈謙爲兗州刺史壬戌改  
輔國將軍爲輔師將軍八月己丑以右將軍行豫州刺  
史劉劬爲平西將軍豫州刺史壬辰以海陵太守劉崇  
智爲冀州刺史九月甲寅立長沙王纂子延之爲始平  
王戊午中領軍王琨遷職己未詔曰夫箕穎之操振古  
所貴沖素之風哲王攸重朕屬橫流之會接難晦之辰  
龕暴剪亂日不暇給今雖關隴猶靄區縣澄氛偃武修  
文於是乎在思崇廉恥用靜馳薄固已物色載懷寢興  
竚歎其有貞栖隱約自事衡樊鑿坏遺榮負釣辭聘志



恬江海行高塵俗者在所精加搜括時以名聞將資園  
矜德茂昭厥禮羣司各舉所知以時授爵乙丑以新除  
平西將軍豫州刺史劉勔爲中領軍冬十月丁卯朔日  
有蝕之十一月丁未索虜遣使獻方物閏月戊子驃騎  
大將軍荊州刺史晉平王休祐以本號爲南徐州刺史  
征南將軍湘州刺史巴陵王休若爲征西將軍荊州刺  
史輔師將軍孟陽爲兖州刺史義陽太守呂安國爲司  
州刺史十二月戊戌司徒建安王休仁解揚州刺史己  
未以征北大將軍南徐州刺史桂陽王休範爲中書監  
中將軍揚州刺史吳興太守建平王景素爲湘州刺史

輔師將軍建安王世子融爲廣州刺史庚申分荆益州  
五郡置三巴校尉

六年春正月乙亥初制間二年一祭南郊間一年一祭  
明堂二月壬寅司徒建安王休仁爲太尉領司徒癸丑  
皇太子納妃甲寅大赦天下巧注從軍不在赦例班賜  
各有差三月乙亥中護軍劉襲卒丁丑以太子詹事張  
永爲護軍將軍夏四月癸亥立第六皇子燮爲晉熙王  
五月丁丑以前軍將軍陳胤宗爲徐州刺史丁亥以冠  
軍將軍吐谷渾拾虔爲平西將軍戊子奉朝請孔玉爲  
寧州刺史六月己亥以第五皇子智井繼東平沖王休

隋庚子以侍中劉韞爲撫軍將軍雍州刺史前將軍鄧  
州刺史沈攸之進號鎮軍將軍揚州刺史桂陽王休範  
爲征南大將軍江州刺史癸卯以鎮南將軍江州刺史  
王景文爲尚書左僕射揚州刺史尚書僕射袁粲爲尚  
書右僕射己未改臨賀郡爲臨慶郡追改東平王休倩  
爲臨慶沖王七月丙戌第五皇子智井薨九月乙丑中  
領軍劉劬加平北將軍戊寅立總明觀徵學士以充之  
置東觀祭酒癸未以第八皇子智渙繼臨慶沖王休倩  
冬十月辛卯立第九皇子贊爲武陵王乙巳以前右軍  
馬詵爲北雍州刺史己酉車駕幸東堂聽訟十一月己

已高麗國遣使獻方物十二月癸巳以邊難未息制父母陷異域悉使婚宦戊戌以始興郡爲宋安郡丙辰護軍將軍張永遷職

七年春正月甲戌置散騎奏舉郎二月癸巳征南大將軍荊州刺史巴陵王休若進號征西大將軍開府儀同三司戊戌置百梁隴蘇永寧安昌富昌南流郡又分廣交州三郡合九郡立越州己亥以前將軍劉康爲平東將軍妖寇宋逸攻合肥殺汝陰太守王穆之郡縣討平之甲寅驃騎大將軍開府儀同三司南徐州刺史晉平王休祐薨戊午以征西大將軍荊州刺史巴陵王休若

爲征北大將軍南徐州刺史湘州刺史建平王景素爲  
荊州刺史三月辛酉索虜遣使獻方物壬戌芮芮國遣  
使奉獻夏四月辛丑減天下死罪一等凡敕繫悉遣之  
甲辰於南兗州置新平郡癸丑金紫光祿大夫張永領  
護軍五月戊午司徒建安王休仁有罪自殺辛酉以寧  
朔長史孫超之爲廣州刺史尚書左僕射揚州刺史王  
景文以刺史領中書監庚午以尚書右僕射袁粲爲尚  
書令新除吏部尚書褚淵爲尚書左僕射辛未監吳郡  
王僧虔行湘州刺史丙戌追免晉平王休祐爲庶人六  
月丁酉以征南大將軍江州刺史桂陽王休範爲驃騎

大將軍南徐州刺史征北大將軍巴陵王休若爲車騎  
大將軍江州刺史甲辰芮芮國遣使獻方物秋七月丁  
巳罷散騎奏舉郎乙丑新除車騎大將軍江州刺史巴  
陵王休若薨桂陽王休範以新除驃騎大將軍還爲江  
州庚午以第三皇子準爲撫軍將軍辛未以太子詹事  
劉秉爲南徐州刺史戊寅以寧朔將軍沈懷明爲南兗  
州刺史乙酉於冀州置西海郡八月戊子第八皇子躋  
繼江夏文獻王義恭庚寅以疾愈大赦天下冀州刺史  
劉崇智加青州刺史戊戌立第三皇子準爲安成王九  
月辛未以越騎校尉周寧民爲徐州刺史冬十月戊午

百濟國遣使獻方物十二月丁酉分豫州南兖州立南  
豫州以歷陽太守王玄載爲南豫州刺史

秦豫元年春正月甲寅朔上有疾不朝會以疾患未痊  
故改元賜孤老貧疾粟帛各有差戊午皇太子會萬國  
於東宮并受貢計二月辛丑以給事黃門侍郎王瞻爲  
司州刺史三月癸丑朔林邑國遣使獻方物己未中書  
監揚州刺史王景文卒夏四月辛卯以撫軍司馬蔡那  
爲益州刺史癸巳以右衛將軍張興爲雍州刺史己亥  
上大漸駟騎大將軍江州刺史桂陽王休範進位司空  
尚書右僕射褚淵爲護軍將軍中領軍劉劭加尚書右

僕射鎮東將軍蔡興宗爲征西將軍開府儀同三司荆  
州刺史鎮軍將軍郢州刺史沈攸之進號安西將軍詔  
曰朕自臨御億兆仍屬戎寇雖每存弘化而惠弗覃遠  
軍國凋弊刑訟未息今大漸維危載深矜歎可緩徭優  
調去繁就約因改之宜詳有簡衷務以愛民爲先以宣  
朕遺意袁粲褚淵劉劭蔡興宗沈攸之同被顧命是日  
上崩于景福殿時年三十四五月戊寅葬臨沂縣莫府  
山高寧陵帝少而和令風姿端雅早失所生養於太后  
宮內大明世諸弟多被猜忌唯上見親常侍路太后醫  
藥好讀書愛文義在藩時撰江左以來文章志又續衛



瓘所注論語二卷行於世及卽大位四方反叛以寬仁待物諸軍帥有父兄弟同逆者並授以禁兵委任不易故衆爲之用莫不盡力平定天下逆黨多被全其有才能者並見授用有如舊臣才學之士多蒙引進參侍文籍應對左右於華林園芳堂講周易常自臨聽末年好鬼神多忌諱言語文書有禍敗凶喪及疑似之言應回避者數百千品有犯必加臯戮改駟邊爲瓜亦以駟字似禍字故也以南苑借張永云且給二百年期訖更啓其事類皆如此宣陽門民間謂之白門上以白門之名不祥甚諱之尚書右丞江謐嘗誤犯上變色曰白汝

家門謚稽顙謝久之方釋太后停屍漆牀先出東宮上嘗幸宮見之怒甚免中庶子官職局以之坐者數十人內外常慮犯觸人不自保宮內禁忌尤甚移牀治壁必先祭土神使文士爲文詞祝策如大祭饗泰始泰豫之際更忍虐好殺左右失旨忤意往往有斲剝斷截者時經略淮泗軍旅不息荒弊積久府藏空竭內外百官並日料祿奉而上奢費過度務爲彫侈每所造制必爲正御三十副御次副又各三十須一物輒造九十枚天下騷然民不堪命其餘事迹別見衆篇親近讒慝剪落皇枝宋氏之業自此衰矣

史臣曰聖人立法垂制所以必稱先王蓋由遺訓餘風  
足以貽之來世也太祖負扆南面實有君人之懿焉經  
國之義雖弘而隆家之道不足彭城王照不窺古本無  
卓爾之姿徒見昆弟之義未識君臣之禮冀以此家情  
行之國道主猜而猶犯恩薄而未悟致以呵訓之微行  
遂成滅親之大禍開端樹隙垂之後人雖天倫之重義  
殊凡戚而中人以下情由恩變至於易衣而出分苦而  
食與夫別宮異門形疎事隔者宜有降矣太宗因易隙  
之情據已行之典剪落洪枝顧不待慮旣而本根無庇  
幼主孤立神器以勢弱傾移靈命隨樂推回改斯蓋履

霜有漸堅冰自至所從來遠也

宋書卷八

宋書卷八考證

明帝紀以尚書左僕射王景文爲尚書僕射。○南史無尚書左僕射五字。考前廢帝紀及王景文傳當云以尚書右僕射王景文爲尚書左僕射。

晉安王子勛舉兵反鎮軍長史鄧琬爲其謀主。○鄧琬諸本皆作劉琬。臣承蒼按子勛傳及鄧琬傳爲子勛

謀主乃鎮軍長史鄧琬。竝無劉琬之名。今從南史改正。

尚書僕射王景文父憂去職。○下文蔡興宗爲尚書左僕射。此尚書下亦當有左字。

以仇池太守楊僧副爲北秦州刺史武都王○僧副南史作僧嗣臣承蒼按氏胡傳泰始二年所封正是僧嗣乃元和之從弟也當從南史

以吳郡太守顧顛之爲湘州刺史○列傳載顛之事多作覲之臣承蒼按顛覲二字音義各殊晉周顛字伯

仁覲之亦字偉仁似當以顛爲是而本傳作覲通鑑從之或又作凱作愷未知孰是並著之以俟考者

左軍將軍張世爲豫州刺史○臣承蒼按張興世本單

名世太宗益爲興世此在泰始二年尚未益興字故仍書原名

立桂陽王休範第二子德副爲廬陵王○桂陽王傳休  
範第三子名德嗣今作德副誤也封廬陵王事傳不  
載

立侍中劉韞第二子銑爲南豐王○南史稱劉韞第三  
子誤

以右衛將軍張興爲雍州刺史○臣承蒼按張興事他

處不見張興世傳興世於泰始五年轉左衛將軍泰  
豫元年爲雍州刺史與此紀合其爲誤脫世字無疑



宋書卷八考證

宋書卷九

梁

沈

約

撰

本紀第九

後廢帝

廢帝諱昱字德融小字慧震明帝長子也大明七年正月辛丑生於衛尉府太宗諸子在孕皆以周易筮之卽以所得之卦爲小字故帝字慧震其餘皇子亦如之泰始二年立爲皇太子三年始制太子改名昱安車乘象輅六年出東宮又制太子元正朝賀服袞冕九章衣泰豫元年四月己亥太宗崩庚子太子卽皇帝位大赦天

下尚書令袁粲護軍將軍褚淵共輔朝政乙巳以護軍將軍張永爲右光祿大夫撫軍將軍安成王爲揚州刺史巳酉特進右光祿大夫劉遵考改爲左光祿大夫五月丁巳以吳興太守張岱爲益州刺史戊辰緣江戍兵老疾者悉聽還班劍依舊入殿六月壬辰詔曰夫興王經制實先民隱方求廣教刑於四維朕以瑣眇夙膺寶歷永言民政未接聽覽眷言乃顧無忘鑒寐可遣大使分行四方觀採風謠問其疾苦有拂民法不便俗者悉各條奏若守宰威恩可紀廉勤允著依事騰聞如獄訟誣枉識事紕繆情公存私害民利己者無或隱昧廣納

芻輿之議博求獻藝之規巡省之道務令精洽深簡行  
識俾若朕親覽焉又詔曰夫寢夢期賢往誥垂美物色  
求良前書稱盛朕以冲昧嗣膺寶業思仰述聖猷勉弘  
政道興言多士常想得人可普下牧守廣加搜採其有  
孝友聞族義讓光閭或匿名屠釣隱身耕牧足以整厲  
澆風扶益淳化者凡厥一善咸無遺逸虛輪佇帛俟聞  
嘉薦京師雨水詔賑卹二縣貧民乙巳尊皇后曰皇太  
后立皇后江氏秋七月戊辰崇拜帝所生陳貴妃爲皇  
太妃閏月丁亥罷宋安郡還屬廣興己丑割南豫州南  
汝陰郡屬西豫州西豫州廬江郡屬豫州甲辰以新除

征西將軍開府儀同三司荊州刺史蔡興宗爲中書監  
光祿大夫安西將軍郢州刺史沈攸之爲鎮西將軍荆  
州刺史南徐州刺史劉秉爲平西將軍郢州刺史新除  
太常建平王景素爲鎮軍將軍南徐州刺史八月戊午  
新除中書監左光祿大夫開府儀同三司蔡興宗薨冬  
十月辛卯撫軍將軍劉韞有罪免官辛未護軍將軍褚  
淵母憂去職十一月己亥新除平西將軍郢州刺史劉  
秉爲尚書左僕射辛丑護軍將軍褚淵還攝本任芮芮  
國高麗國遣使獻方物十二月索虜寇義陽丁巳司州  
刺史王瞻擊破之

元徽元年春正月戊寅朔改元大赦天下壬寅詔曰夫  
緩法昭恩裁風茂典蠲憲貸告訓俗彝義朕臨馭宸樞  
夤制氓寓式存寬簡思孚矜惠今開元肆宥萬品惟新  
凡茲流斥宜均弘洗自元年以前貽罪徙放者悉聽還  
本土二月乙亥以晉熙王燮爲郢州刺史三月丙申以  
撫軍長史何恢爲廣州刺史婆利國遣使獻方物戊戌  
以前淮南太守劉靈遺爲南豫州刺史夏五月辛卯以  
輔師將軍李安民爲司州刺史丙申河南王遣使獻方  
物六月壬子以越州刺史陳伯紹爲交州刺史乙卯特  
進左光祿大夫劉遵考卒壽陽大水己未遣殿中將軍

賑卹慰勞丙寅以左軍將軍孟次陽爲兗州刺史秋七月丁丑散騎常侍顧長康長水校尉何翌之表上所撰諫林上自虞舜下及晉武凡十二卷八月辛亥詔曰分方正俗著自虞冊川谷異制煥乎姬典故井遂有辨閭伍無雜用能七教克宣八政斯序雖綿代殊軌沿革異儀或民懷遷俗或國尚典徙漢陽列燕代之豪關西熾齊楚之族並通籍新邑卽居成舊洎金行委御禮樂南移中州黎庶襁負揚越聖武造運道一闕區貽長世之規申土斷之制而夷險相因盈晦遞襲歲饑流戎役惰散違鄉寓境漸至繁積宜式遵鴻軌以爲永憲庶阜

俗昌民反風定保夷胥山之險澄瀚海之波括河圖於  
九服振玉軻於五都矣秘書丞王儉表上所撰七志三  
十卷京師旱甲寅詔曰比亢序愆度留熏燿晷有傷秋  
稼方貽民瘼朕以眇疚未弘政道囹圄尚繁枉滯猶積  
夕厲晨矜每惻于懷尚書令可與執法以下就訊衆獄  
使寃訟洗遂困弊昭蘇頒下州郡咸令無壅癸亥鎮軍  
將軍南徐州刺史建平王景素進號鎮北將軍庚午陳  
留王曹鈺薨九月壬午詔曰國賦氓稅蓋有恒品往屬  
戎難務先軍實徵課之宜或乖昔准湘江二州糧運偏  
積調役旣繁庶徒彌擾因循權政容有未革民單力弊



歲月愈甚永言矜歎情兼宵寐可遣使到所明加詳察  
其輸違舊令役非公限者並卽蠲改具條以聞丁亥立  
衡陽王嶷子伯玉爲南平王冬十月壬子以撫軍司馬  
王玄載爲梁南秦二州刺史癸酉割南兖州之鍾離豫  
州之馬頭又分秦郡梁郡歷陽置新昌郡立徐州十一  
月丙子以散騎常侍垣閔爲徐州刺史丁丑尚書令袁  
粲母喪去職十二月癸卯朔日有蝕之乙巳司空江州  
刺史桂陽王休範進位太尉尚書令袁粲還攝本任加  
號衛將軍癸亥立前建安王世子伯融爲始安縣王丙  
寅河南王遣使獻方物

二年春正月庚子以右光祿大夫張永爲征北將軍南  
兗州刺史二月己巳加護軍將軍褚淵中軍將軍三月  
癸酉以左衛將軍王寬爲南豫州刺史夏四月癸亥詔  
曰頃列爵叙勲銓榮酬義條流積廣又各淹闕歲往事  
留理至逋壅在所參差多違甄飭賞未均洽每疚厥心  
可悉依舊准並下注職五月壬子太尉江州刺史桂陽  
王休範舉兵反庚寅內外戒嚴加中領軍劉劭鎮軍將  
軍加右衛將軍齊王平南將軍前鋒南討出屯新亭征  
北將軍張永屯白下前南兗州刺史沈懷明戍石頭衛  
將軍袁粲中軍將軍褚淵入衛殿省壬辰賊奄至攻新

亭壘齊王拒擊大破之越騎校尉張敬兒斬休範賊黨  
杜黑蠡丁文豪分軍向朱雀航劉劭拒賊敗績力戰死  
之右軍將軍王道隆奔走遇害張永潰於白下沈懷明  
自石頭奔散戊午撫軍典籤茅恬開東府納賊賊入屯  
中堂羽林監陳顯達擊大破之丙申張敬兒等破賊於  
宜陽門莊嚴寺小市進平東府城梟擒羣賊賞賜封爵  
各有差丁酉詔京邑二縣埋藏所殺賊并戰亡者復同  
京城是日解嚴大赦天下文武賜位一等戊戌原除江  
州逋債其有課非常調役爲民蠹者悉皆蠲停詔曰頃  
國賦多騫公儲罕給近治戎雖淺而軍費已多廩藏虛

罄難用馭遠宜矯革淫長務在節儉其供奉服御悉就  
減撤雕文靡麗廢而勿修凡諸游費一皆禁斷外可詳  
爲科格荊州刺史沈攸之南徐州刺史建平王景素郢  
州刺史晉熙王燮湘州刺史王僧虔雍州刺史張興世  
並舉義兵赴京師己亥以第七皇弟友爲江州刺史芮  
芮國遣使獻方物六月庚子以平南將軍齊王爲中領  
軍鎮軍將軍南兖州刺史癸卯晉熙王燮遣軍尅尋陽  
江州平戊申以淮南太守任農夫爲豫州刺史右將軍  
南豫州刺史王寬進號平西將軍壬戌改輔師將軍還  
爲輔國秋七月庚辰立第七皇弟友爲邵陵王辛巳以

撫軍司馬孟次陽爲兗州刺史乙酉鎮西將軍荊州刺  
史沈攸之進號征西大將軍鎮北將軍徐州刺史建平  
王景素進號征北將軍並開府儀同三司征虜將軍郢  
州刺史晉熙王燮進號安西將軍前將軍湘州刺史王  
僧虔進號平南將軍八月辛酉以征虜行參軍劉延祖  
爲寧州刺史九月壬辰以遊擊將軍呂安國爲兗州刺  
史丁酉以尚書令新除衛將軍袁粲爲中書監卽本號  
開府儀同三司領司徒加護軍將軍褚淵尚書令撫軍  
將軍揚州刺史安成王進號車騎將軍冬十月庚申以  
新除侍中王蒞爲湘州刺史甲子以遊擊將軍陳顯達

爲廣州刺史十一月丙戌御加元服大赦天下賜民男  
子爵一級爲父後及三老孝悌力田者爵二級鰥寡孤  
獨篤癯不能自存者穀五斛年八十以上加帛一匹大  
酺五日賜王公以下各有差十二月癸亥立第八皇弟  
躋爲江夏王第九皇弟贊爲武陵王

三年春正月辛巳車駕親祠南郊明堂三月丙寅河南  
王遣使獻方物己巳以車騎將軍張敬兒爲雍州刺史  
其日京師大水遣尚書郎官長檢行賑賜閏月戊戌詔  
曰頃民俗滋弊國度未殷歲時屢騫編戶不給且邊虞  
尚警徭費彌繁永言夕惕寢興增疚思弘豐耗之制以

淳約素之風庶待蓄拯民以康治道大官珍膳御府麗服諸所供擬一皆減撤可詳爲其格務從簡衷夏四月遣尚書郎到諸州檢括民戶窮老尤貧者蠲除課調丁壯猶有生業隨宜寬申貲財足以克限者督令洗畢丙戌車駕幸中堂聽訟六月癸未北國使至兼司徒袁粲尚書令褚淵並固讓秋七月庚戌以粲爲尚書令壬戌以給事黃門侍郎劉懷珍爲豫州刺史八月庚子加護軍將軍褚淵中書監九月丙辰征西大將軍河南王吐谷渾拾寅進號車騎大將軍冬十月丙戌高麗國遣使獻方物十二月乙丑以冠軍將軍姚道和爲司州刺史

四年春正月己亥車駕躬耕籍田大赦天下賜力田爵一級貸貧民糧種壬子以梁南秦二州刺史王玄載爲益州刺史二月壬戌以步兵校尉范栢年爲梁南秦二州刺史丁卯加金紫光祿大夫王琨特進夏五月以寧朔將軍武都王楊文度爲北秦州刺史乙未尚書右丞虞玩之表陳時事曰天府虛散垂三十年江荆諸州稅調本少自頃以來軍募多乏其穀帛所入折供文武豫充司徐開口待哺西北戎將裸身求衣委輸京都益爲寡薄天府所資唯有淮海民荒財單不及曩日而國度引費四倍元嘉二衛臺坊人力五不餘一都水材官朽



散十不兩存備豫都庫材竹俱盡東西二堦塼瓦雙匱  
敕令給賜悉仰交市尚書省舍日就傾頽第宅府署類  
多穿毀視不遑救知不暇及尋所入定調用恒不周既  
無儲畜理至空盡積弊累耗鍾於今日昔歲奉敕課以  
揚徐衆逋凡入米穀六十萬斛錢五千餘萬布絹五萬  
匹雜物在外賴此相贍故得推移卽今所懸轉多興用  
漸廣深懼供奉頓闕軍器輟功將士飢怨百官騫祿署  
府謝雕麗之器土木停緹紫之容國戒無以贍勲求無  
以給如愚管所慮不月則歲矣經國遠謀臣所不敢言  
朝夕祇勤心存於匪懈起伏震遽事屬昌聞伏願陛下

留須臾之鑒垂永代之計發不世之詔施必行之典則  
氓祇齊懽高卑同泰帝優詔答之庚戌以驍騎將軍曹  
欣之爲徐州刺史六月乙亥加鎮軍將軍齊王尚書左  
僕射秋七月戊子征北將軍南徐州刺史建平王景素  
據京城反己丑內外纂嚴遣驍騎將軍任農夫領軍將  
軍黃回北討鎮軍將軍齊王總統衆軍曲赦南徐州始  
安王伯融都鄉侯伯猷賜死辛卯豫州刺史段佛榮統  
前鋒馬步衆軍甲午軍主左軍將軍張保戰敗見殺黃  
回等至京城與景素諸軍戰連破之乙未尅京城斬景  
素同逆皆伏誅其日解嚴丙申大赦天下封賞各有差

原京邑二縣元年以前逋調辛丑以武陵王贊爲南徐州刺史八月丁卯立第十皇弟颯爲南陽王第十一皇弟嵩爲新興王第十二皇弟禧爲始建王庚午以給事黃門侍郎阮佃夫爲南豫州刺史乙酉以行青冀二州刺史劉善明爲青冀二州刺史九月丁亥割郢州之隨郡屬司州戊子驍騎將軍高道慶有罪賜死己丑車騎將軍揚州刺史安成王進號驃騎大將軍開府儀同三司安西將軍郢州刺史晉熙王燮進號征西將軍冬十月辛酉以吏部尚書王僧虔爲尚書右僕射宕昌王梁彌機爲安西將軍河涼二州刺史丙寅中書監護軍將

軍褚淵母憂去職十一月庚戌詔攝本任

五年春二月壬申以建寧太守柳和爲寧州刺史四月  
甲戌豫州刺史阮佃夫步兵校尉申伯宗朱幼謀廢立  
佃夫幼下獄死伯宗伏誅五月己亥以左軍將軍沈景  
德爲交州刺史驃騎將軍全景文爲南豫州刺史丙午  
以屯騎校尉孫曇瓘爲越州刺史六月甲戌誅司徒左  
長史沈勃散騎常侍杜幼文遊擊將軍孫超之長水校  
尉杜叔文大赦天下七月戊子夜帝殞於仁壽殿時年  
十五己丑皇太后令曰衛將軍領軍中書監八座昱以  
冢嫡嗣登皇統庶其體識日弘社稷有寄豈意窮凶極

悖自幼而長善無細而不違惡有大而必蹈前後訓誘  
常加隱蔽險戾難移日月滋甚棄冠毀冕長襲戎衣犬  
馬是狎鷹隼是愛皂歷軒殿之中韝縶宸扆之側至乃  
單騎遠郊獨宿深野手揮矛鋌躬行剗斲白刃爲弄器  
斬害爲恒務捨交戟之衛委天畢之儀趨步闌闔酣詬  
墟肆宵遊忘返宴寢營舍奪人子女掠人財物方筴所  
不書振古所未聞沈勃儒士孫超功臣幼文兄弟並豫  
勲効四人無罪一朝同戮飛鏃鼓劔孩稚無遺屠裂肝  
腸以爲戲謔投骸江流以爲權笑又淫費無度帑藏空  
竭橫賦關河專充別蓄黔首嗷嗷厝生無所吾與其所

生每厲以義方遂謀酖毒將騁凶忿沈憂假日慮不終  
朝自昔辛癸爰及幽厲方之於此未譬萬分民怨旣深  
神怒已積七廟阽危四海褫氣廢昏立明前代令範况  
迺滅義反道天人所棄豐深牧野理絕桐宮故密令蕭  
領軍潛運明略幽顯協規普天同泰驃騎大將軍安成  
王體自太宗天挺淹叡風神凝遠德映在田地隆親茂  
皇歷攸歸億兆係心含生屬望宜光奉祖宗臨享萬國  
便依舊典以時奉行未亡人追往傷懷永言感絕太后  
又今日昱窮凶極暴自取灰滅雖曰罪招能無傷悼棄  
同品庶顧所不忍可特追封蒼梧郡王葬丹陽秣陵縣

郊壇西初昱在東宮年五六歲時始就書學而惰業好  
嬉戲主師不能禁好緣漆帳竿去地丈餘如此者半食  
久乃下年漸長喜怒乖節左右有失旨者輒手加撲打  
徒跣蹲踞以此爲常主師以白太宗上輒敕昱所生嚴  
加捶訓及嗣位內畏太后外憚諸大臣猶未得肆志自  
加元服變態轉興內外稍無以制三年秋冬間便好出  
遊行太妃每乘青篋車隨相檢攝昱漸自放恣太妃不  
復能禁單將左右棄部伍或十里二十里或入市里或  
往營署日暮乃歸四年春夏此行彌數自京城尅定意  
志轉驕於是無日不出與左右人解僧智張五兒恒相

馳逐夜出開承明門夕去晨反晨出暮歸從者並執鋌  
矛行人男女及犬馬牛驢值無免者民間擾懼晝日不  
敢開門道上行人殆絕常著小袴褶未嘗服衣冠或有  
忤意輒加以虐刑有白梃數十枚各有名號鉞椎鑿鋸  
之徒不離左右嘗以鐵椎椎人陰破左右人見之有斂  
眉者昱大怒令此人袒胛正立以矛刺胛洞過於耀靈  
殿上養驢數十頭所自乘馬養於御牀側先是民間訛  
言謂太宗不男陳太妃本李道兒妾道路之言或云道  
兒子也昱每出入去來常自稱劉統或自號李將軍與  
右衛翼輦營女子私通每從之遊持數千錢供酒肉之



費阮佃夫腹心人張羊爲佃夫所委信佃夫敗叛走後  
捕得昱自於承明門以車轆殺之杜延載沈勃杜幼文  
孫超皆躬運矛鋌手自嚮割執幼文兄叔文於玄武湖  
北昱馳馬執稍自往刺之制露車一乘其上施蓬乘以  
出入從者不過數十人羽儀追之恒不及又各慮禍亦  
不敢追尋唯整部伍別在一處瞻望而已凡諸鄙事過  
目則能鍛鍊金銀裁衣作帽莫不精絕未嘗吹箎執管  
便韻天性好殺以此爲懽一日無事輒慘慘不樂內外  
百司人不自保殿省憂遑夕不及旦齊王順天人之心  
潛圖廢立與直閣將軍王敬則謀之七月七日昱乘露

車從二百許人無復鹵簿羽儀往青園尼寺晚至新安寺就曇度道人飲酒醉夕扶還於仁壽殿東阿氈幄中臥時昱出入無恒省內諸閣夜皆不閉且羣下畏相逢值無敢出者宿衛並逃避內外無相禁攝王敬則先結昱左右楊玉夫楊萬年呂欣之湯成之陳奉伯張石留羅僧智鍾千載嚴道福雷道賜戴昭祖許啓戚元寶盛道泰鍾千秋王天寶公上延孫俞成錢道寶馬敬之陳寶直吳瓊之劉印魯唐天寶俞孫等二十五人謀共取昱其夕敬則出外玉夫見昱醉熟無所知乃與萬年同入氈幄內以昱防身刀斬之奉伯提昱首依常行法稱

宋書卷九  
敕開承明門出以首與敬則馳至領軍府以首呈齊王  
王乃戎服率左右數十人稱行還開承明門入昱他夕  
每開門門者震懾不敢視至是弗之疑齊王既入曉乃  
奉太后令奉迎安成王

史臣曰喪國亡家之主雖適末同途發軔或異也前廢  
帝卑遊褻幸皆龍駕帝飾傳警清路蒼梧王則藏璽懷  
紱魚服忘反危冠短服匹馬孤征至於殞身覆祚其理  
若一姬夏之隆質文異尚亡國之道其亦然乎

宋書卷九

宋書卷九考證

後廢帝紀張敬兒等破賊於宜陽門莊嚴寺○宜一本  
作宣鄴陽王傳亦作宣

豫州刺史段佛榮統前鋒馬步衆軍○段諸本俱訛殿  
或誤爲殷今據建平王傳改正

晉熙王燮進號征西將軍○征西一本作鎮西與晉熙  
王傳合當從之

宋書卷九考證

宋書卷十

梁

沈

約

撰

本紀第十

順帝

順皇帝諱準字仲謀小字智觀明帝第三子也泰始五年七月癸丑生七年封安成王食邑三千戶仍拜撫軍將軍置佐史廢帝卽位爲揚州刺史元徽二年進號車騎將軍都督揚南豫二州諸軍事給鼓吹一部刺史如故四年又進號驃騎大將軍開府儀同三司班劔三十人都督刺史如故元徽五年七月戊子夜廢帝殞奉迎

王入居朝堂壬辰卽皇帝位昇明元年改元大赦天下  
賜文武位二等甲午鎮軍將軍齊王出鎮東城輔政作  
相丙申詔曰露臺息構義光漢德雉裘焚制事隆晉道  
故以檢奢軌化敦儉馭俗頃旬服未靜師旅連年委蓄  
屢空勞敝莫偃而丹雘之飾糜耗難訾寶賂之費徵賦  
靡計今車服儀制實宜約損使徽章有序勿得侈溢可  
罷省御府二署凡工麗彫鐫傷風毀治一皆禁斷庶永  
昭憲則弘茲始政征西大將軍荊州刺史沈攸之進號  
車騎大將軍開府儀同三司尚書左僕射中領軍鎮軍  
將軍南兗州刺史齊王爲司空錄尚書事驃騎大將軍

刺史如故中書令衛將軍開府儀同三司撫軍將軍劉  
秉爲尚書令加中軍將軍安西將軍郢州刺史晉熙王  
燮爲撫軍將軍揚州刺史南陽王颯爲郢州刺史辛丑  
尚書右僕射王僧虔爲尚書僕射右衛將軍劉韞爲中  
領軍金紫光祿大夫王琨爲右光祿大夫給司空齊王  
錢五百萬布五千匹癸卯車駕謁太廟丙午以安西參  
軍明慶符爲青冀二州刺史武陵王贊爲郢州刺史新  
除郢州刺史南陽王颯爲湘州刺史司空南兗州刺史  
齊王改領南徐州刺史征虜將軍李安民爲南兗州刺  
史離州大水八月壬子遣使賑卹蠲除稅調以驃騎長



史劉澄之爲南豫州刺史山陽太守于天寶新吳縣子  
秦立有臯下獄死戊午改平準署辛酉以宣城太守李  
靈謙爲兗州刺史癸亥司空袁粲鎮石頭丁卯原除元  
年以前逋調復郡縣祿田戊辰崇拜帝所生陳昭華爲  
皇太妃庚午司空長史謝朏衛軍長史江斆中書侍郎  
褚炫武陵王文學劉侯入直殿省參侍文義齊王固讓  
司空庚辰以爲驃騎大將軍開府儀同三司九月己丑  
詔曰昔聖王旣沒淳風已衰龜書永湮龍圖長秘故三  
代之末德刑相擾世淪物競道陂人諛然猶正士比轂  
奇才接軫朕襲運金樞纂靈瑤極負扈巡政日晏忘疲

永言興替望古盈慮姬夏典載猶傳緇帙漢魏餘文布  
在方冊故元封興茂才之制地節荆獨行之品振維務  
本存乎得人今可宣下州郡搜揚幽仄標采鄉邑隨名  
薦上朕將親覽甄其茂異庶野無遺彥永激遐芬己酉  
廬陵王曷薨冬十一月己酉倭國遣使獻方物丙午員  
外散騎侍郎胡羨生行越州刺史以交州刺史沈景德  
爲廣州刺史十二月丁巳以驍騎將軍王廣之爲徐州  
刺史車騎大將軍荊州刺史沈攸之舉兵反丁卯錄公  
齊王入守朝堂侍中蕭嶷鎮東府戊辰內外纂嚴己巳  
以郢州刺史武陵王贊爲安西將軍荊州刺史征虜將

軍離州刺史張敬兒進號鎮軍將軍右衛將軍黃回爲  
平西將軍郢州刺史督諸軍前鋒南討征虜將軍呂安  
國爲湘州刺史都官尚書王寬加平西將軍庚午新除  
左衛將軍齊王世子奉新除撫軍將軍揚州刺史晉熙  
王燮鎮尋陽之益城壬申以驍騎將軍周槃龍爲廣州  
刺史是日司徒袁粲據石頭反尚書令劉秉黃門侍郎  
劉述冠軍王蒞率衆赴之黃回及輔國將軍孫曇瓘屯  
騎校尉王宜興輔國將軍任侯伯左軍將軍彭文之密  
相響應中領軍劉韞直閣將軍卜伯興在殿內同謀錄  
公齊王誅韞等於省內軍主蘇烈王天生薛道淵戴僧

靜等陷石頭斬粲於城內秉述蒞踰城走追擒之並伏  
誅其餘無所問豫州刺史劉懷珍離州刺史張敬兒廣  
州刺史陳顯達並舉義兵司州刺史姚道和梁州刺史  
范栢年湘州行事庾佩玉擁衆懷貳甲戌大赦天下乙  
亥以尚書僕射王僧虔爲尚書左僕射新除中書令王  
延之爲尚書右僕射吳郡太守劉遐據郡反輔國將軍  
張瓌討斬之閏月辛巳屯騎校尉王宜興有梟伏誅癸  
巳沈攸之攻圍郢城前軍長史柳世隆固守攸之弟登  
之作亂於吳興吳興太守沈文秀討斬之己亥內外戒  
嚴假錄公齊王黃鉞辛丑寧朔將軍北秦州刺史武都

王楊文慶進號征西將軍乙巳錄公齊王出頓新亭

二年春正月沈攸之遣將公孫方平據西陽辛酉建寧太守張謨擊破之丁卯沈攸之自郢城奔散己巳華容縣民斬送之左將軍豫州刺史劉懷珍進號平南將軍辛未鎮軍將軍雒州刺史張敬兒克江陵斬攸之子光琰荊州平同逆皆伏誅丙子解嚴以新除侍中柳世隆爲尚書右僕射是日錄公齊王旋鎮東府丁丑以江州刺史邵陵王友爲安南將軍豫州刺史左衛將軍齊王世子爲江州刺史侍中蕭嶷爲領軍鎮軍將軍雒州刺史張敬兒進號征西將軍平西將軍郢州刺史黃回進

號鎮西將軍二月庚辰以尚書左僕射王僧虔爲尚書  
令尚書右僕射王延之爲尚書左僕射癸未錄公齊王  
加授太尉衛將軍褚淵爲中書監司空甲申曲赦荊州  
丙戌撫軍將軍揚州刺史晉熙王燮進號中軍將軍開  
府儀同三司戊子蠲離州緣沔居民前被水災者租布  
三年辛卯郢州刺史新除鎮南將軍黃回爲鎮北將軍  
南兖州刺史南兖州刺史李安民爲郢州刺史癸巳以  
山陰令傅琰爲益州刺史丙申左軍將軍彭文之有臯  
下獄死行湘州事任侯伯殺前湘州行事庾佩玉傳首  
京邑三月庚戌以廣州刺史周槃龍爲司州刺史輔國

將軍劉悛爲廣州刺史丙子給太尉齊王羽葆鼓吹夏  
四月己卯以游擊將軍垣崇祖爲兗州刺史辛卯新除  
鎮北將軍南兗州刺史黃回有辜賜死甲午輔國將軍  
淮南宣城二郡太守蕭映行南兗州刺史五月戊午倭  
國王武遣使獻方物以武爲安東大將軍輔國將軍行  
湘州事任侯伯有辜伏誅六月己丑以前新會太守趙  
超民爲交州刺史丁酉以輔國將軍楊文弘爲北秦州  
刺史封武都王八月辛卯太尉齊王表斷奇飾麗服凡  
十有四條乙未以江州刺史齊王世子爲領軍將軍撫  
軍將軍丙申以領軍蕭嶷爲江州刺史九月乙巳朔日

有蝕之丙午加太尉齊王黃鉞都督中外諸軍事太傅  
領揚州牧劔履上殿入朝不趨贊拜不名置左右長史  
司馬從事中郎掾屬各四人中軍將軍揚州刺史晉熙  
王燮爲司徒戊申行南兗州刺史蕭映爲南兗州刺史  
甲寅給太傅齊王三望車己未芮芮國遣使獻方物癸  
酉武陵內史張澹有臯下獄死冬十月丁丑寧朔將軍  
淮南宣城二郡太守蕭晃爲豫州刺史孫曇瓘先逃亡  
己卯擒獲伏誅壬寅立皇后謝氏減死臯一等五歲刑  
以下悉原十二月壬子立故武昌太守劉琨息頒爲南  
豐縣王癸亥臨澧侯劉晃謀反晃及黨與皆伏誅甲子



改封南陽王夔爲隨郡王改隨陽郡十二月丙戌皇后  
見于太廟戊子高麗國遣使獻方物

三年春正月甲辰以江州刺史蕭巖爲鎮西將軍荊州  
刺史尚書左僕射王延之爲安南將軍江州刺史安西  
長史蕭順之爲郢州刺史乙卯太傅齊王表諸負官物  
質役者悉原除辛亥以驍騎將軍王玄邈爲梁南秦二  
州刺史領軍將軍撫軍將軍齊王世子加尚書僕射進  
號中軍大將軍開府儀同三司丙辰加太傅齊王前部  
羽葆鼓吹丁巳詔太傅府依舊辟召以征西將軍離州  
刺史張敬兒爲護軍將軍新除給事黃門侍郎蕭諱爲

離州刺史二月丙子安南將軍南豫州刺史邵陵王友  
薨三月癸卯朔日有蝕之甲辰崇太傅爲相國總百揆  
封十郡爲齊公備九錫之禮加璽紱遠游冠位在諸王  
上加相國綠綬綬其驃騎大將軍揚州牧南徐州刺史  
如故丙午以中軍大將軍諱爲南豫州刺史齊公世子  
副貳相國綠綬綬庚戌臨川王綽謀反綽及黨與皆伏  
誅丁巳以齊國初建給錢五百萬布五千匹絹千匹夏  
四月壬申進齊公爵爲齊王增封十郡甲戌安西將軍  
武陵王贊薨丙戌命齊王冕十有二旒建天子旌旗出  
警入蹕乘金根車駕六馬備五時副車置旄頭雲罕樂

儻八佾設鐘簋宮縣進世子爲太子王子王女王孫爵命之號壹如舊儀辛卯天祿永終禪位于齊壬辰帝遜位于東郊旣而遷居丹陽宮齊王踐阼封帝爲汝陰王待以不臣之禮行宋正朔上書不爲表答表不爲詔建元元年五月己未徂于丹陽宮時年十三諡曰順帝六月乙酉葬于遂寧陵

史臣曰聖王膺錄自非接亂承微則天歷不至也自三五以來受命之主莫不乘淪亡之極然後符樂推之運水德遷謝其來久矣豈止於區區汝陰揖禪而已哉

宋書卷十

宋書卷十考證

順帝紀武陵王文學劉侯入直殿省○侯一本作候